

田間詩集卷第十四

客隱集

起丙午止丁未



贈建安令余東望



白鶴城荒此再過悲涼其奈客心何  
官亭騷騷民供苦  
客貨蕭條藩占多  
澗草自生忘歲晚  
巖花欲放漏春和  
同鄉賴有通家誼  
長埽高齋待嘯歌

黃華山懷古

甌越自來形勝地  
黃華山踞一城  
巔女牆繚繞悲遺蹟  
明將軍時  
官閣崱嶷憶昔年  
事去空懷三戶憤  
劫餘猶起萬家煙  
遊人莫話興亡事  
一眺川原一黯然

梅仙山同吳炎牧作

出城曾不費躋攀  
梅尉栖真住此山  
吳地早聞爲市卒  
閩鄉爭說隸仙班  
燒丹井廢閒澆圃  
栖鶴松孤尚護關  
更有墜鞭遺蹟在  
渡頭惆悵幾時還

送莆田林穆之遊南康將有貴竹之行

一時詞客散芝城  
又送君爲萬里行  
舟楫前途應得伴  
時二如炎  
屋梁孤月倍含情  
鄱陽水闊山城近  
貴竹煙  
消驛路平此去  
故人如見問白頭  
不改舊狂生

送徐燕嘉之任忠州

忠州深在萬山阿  
驛路崎嶇客罕過  
兵馬頻經煙瘴少

官僚初選士人多  
公田稅薄供薪俸  
佐吏衙閒足咏歌  
見說蠻中容宦隱  
邊方課最法如何

冒暑過放生池訪竺菴大師卽事作

精舍無多路往還  
隔水遙僕夫愁過淺  
官馬怯浮橋野  
廟防兵住空船  
小婦搖放生溪近  
處隊隊有魚苗  
大樹根堪坐乘涼  
勉策筇僧貧惟打飯  
客到正鳴鐘上  
座開堂早  
菴有一  
拙大師  
新陰覆院濃  
當門山色古  
言是鐵獅

峰

年紀看相近鬚髯總皓然  
怪人猶信佛覺爾懶談禪  
浴室先僧到繩牀任客眠  
晚涼思遡返對岸喚漁船

暑中余東望見過

炎威最苦向西軒席地貪眠戒出門笑我滿牀文債積  
較君堆案簿書繁許分茶啜心先爽欲寫詩酬眼更昏  
稍待近秋涼雨後衙齋時辦夜深樽  
建安自昔稱仙吏近見衝疲官太勞每日出城供驛遞  
終年捧檄集舟艘身孱轉覺忙中健暑虐偏於劇處逃  
猶有餘閒能念我時來旅舍慰牢騷

寄浦城潘雪僧明經

秋來尺素往還頻知爾曾師浪杖人潦草評詩如有悟  
雪僧批竺公尋常下筆總無塵明經罷對非因老竿牘  
鴈字詩極佳

無求自合貧久矣國門通不至可能乞假訪遺民聞雪僧內

人禁其遠出故嘲之

酬吳山大師相期武夷一晤即汪扶光

吳山山下逃名客已作曹溪得法僧聞道鬚髯仍戟似  
寄來翰墨尚花騰丹心久死爐中火熱血惟然洞上燈  
相距幔亭皆百里可能高興與同乘

寄松溪令董礪阜索邑志

松溪縣僻萬山阿為吏風流一郡歌閣室甘貧妨政少  
升衙無事得閒多上官禮失還相恕游客途窮亦罕過  
聞與嗣宗修邑史先朝遺蹟好搜羅

錢公舊是吾宗彥曾以明經令此鄉少日擊璫殊激烈  
老年為政號循良學宮俎豆何由得易代謳吟且未忘  
幸有誌書登宦蹟不妨採實與編詳

錢公諱嘉徵秀水人國學抗疏擊魏

璫後令松溪有政聲

中秋後十日芝山寺為別駕嚴君初度

獨木橋南秋氣清使君避客出山城齋居已廢懸弧禮

岳降偏傷戲綵情

時方有太夫人戚

老吏執香隨梵誦故人攜

手聽溪聲遙知夜靜雙林寂好是吟詩繞砌行

題馮歷奇小影

此老鬚多髮全禿有書束起不肯讀芒鞋不襪欲何為

纔向湘江新濯足

題畫為余東望明府壽

吳興詞客寫秋峰錦樹丹黃間碧叢倒挂絕壁者何樹

疑是桃花巖上紅可憐青松獨不變蒼然孤挺萬木中

閩天霜薄紅葉少此景略與吾鄉同松根有亭看瀑布

耳畔微聞聲淙淙人生作吏常苦俗要有丘壑存胸中

此公於此興不淺清機應與治理通谿亭徙倚若有待

山路髣髴無人踪只在此中呼或出多是采芝商山翁

黃華高士圖為連石菴初度

吾有老酒友意氣凌塵寰自遭喪亂來流寓黃華山文

交風雅伯身繫軍吏班弓箭恒在腰筆墨且未刪歌管  
日徵逐酒伴時往還莫笑囊無錢樽中頗不慳所以初  
度辰賓客滿柴關誰者爲此圖山水髣髴間老松色不  
變萬木葉以斑最高者黃華城郭隱然環下有臨水閣  
如聞水潺潺亭內二老叟意思殊蕭閒看山語何事相  
顧開笑顏似是候酒來相將共躋攀二叟一爲子一或  
爲西頑

次韻酬葉慕廬司李見贈客中納姬之作

莫怪篇章罷揣摩綵毫祇辦畫雙蛾睡鄉乍覺溫柔妙  
詩卷時沾粉澤多謬許詞人甘白首別無小婦泣紅羅

來詩布却妙半  
臂耐寒多句

把君佳句私求解半臂情疑不許歌

承鄭羽人廣文移樽見過兼錫酒器大醉謝之

瀟洒風流鄭廣文台州司戶不如君移樽偏在雨中好  
度曲都於醉裏聞海味禁嚴僮密貫泉窰珍重客爭分  
莫嫌鬚落歌兒手鑷白毋煩累細君

是夜大醉鬚頗  
遭歌兒毒手

贈程姜若司馬

我生足跡多在閩茲來兩見芝山春建州遊宦號仙吏  
下車半是平生親司馬程子夙所慕一見心醉如飲醇  
君亦好我頻倒屣往還無間昏與晨狂奴老去益無禮  
唯君許我能率真司業酒錢仁祖米資我旅食不知貧

去歲正月攝府事百務殷集何艱辛同時姚子志氣合  
謀蒐府乘爲重新假館授餐延我住書史筆墨紛然陳  
懼我獨力不勝任廣召多士憑諮詢檄下各邑徵故事  
至今應者猶逡巡感君此誼誓卒業往往閣筆志莫伸  
覩顏素餐且一載又復值君初度辰我欲有詞侑君酒  
郡人誦祝亦已頻所願撰書早晚就俾君名垂功不泯  
文章小道壽千古金石川岳非等倫旣以壽君還自壽  
微名竊附君後塵况復闡幽有陰德延及累世寧止身

姚仲子經三司理初度書懷爲壽

仲子懸弧日頌聲徧海涯高堂羅屏障文采光陸離我

老不善諛諛亦爲賸詞請述目所悉併以陳鄙私仲子  
好文采下筆言纏纏吐音恥細響摛藻必色絲辭與鮑  
照麗詩耽李賀奇手註昌谷集讀者皆解願忘年諸老  
友往往奉盤匱才慧無不可博藝同兒嬉丹青性所好  
神悟本無師古來作者妙精意悉已窺所以髮甫燥才  
名海內馳科第何足道唾手卽得之奉命理建寧板輿  
疋馬隨平生好山水深與此郡宜此郡人文藪風流今  
少衰君來甫三載已覺俗漸移君才旣通敏亦復惠以  
慈疑獄一語決曾不費鞭笞據案口授書胥吏共指麾  
上官奇君才請讞允不疑同寮奇君才政事動相咨下

更奇君才請益忘尊卑椽史奇君才有弊秋毫釐此輩  
君所恕亦弗受其詒文武及僚屬恃爲芍藥劑談言以  
解紛消弭人不知以是闔閭間兵民無參差以是北堂  
上平反母氏怡以是庭階前郁郁產靈芝以是門牆下  
琅琅珊瑚枝以是春草堂退食多暇時以是四方客交  
譽滿路達客來曾不厭厚薄各有施劣伎盡可獻寸長  
亦不遺笑彼妄自尊拒人色訑訑恩怨渾不計羞殺鄉  
里兒歌伶自遠來終日侑客卮筐篚隨時陳半爲行旅  
資以入計所出其費每不貲君性復好事所知無不爲  
同人有著作一一付棗梨近者通都橋建樹已有基開

元塔必興願力齊須彌洵由精神大簿書不足羈加以  
才四應樂此不爲疲最重脩府乘謬以史才推佐郡有  
程子同心相繫維深感知已誼詎敢老鈍辭假館給紙  
筆素餐將一朞檄書行八邑應者來何遲此事貴撫實  
采訪尚恐欺一事有訛缺將爲後世嗤如何諸長吏隻  
字不肯貽雖有龍門才筆墨空淋漓去冬初開局朝夕  
恒於斯多士分纂脩告成庶有期此輩本寒素合室望  
餽糜雖損當事俸不給卒歲炊入春皆不來老夫自下  
帷新聞苦難得往籍勞重披先後百年間謬誤當問誰  
縣遣小吏至十指如懸錘作字未踰百捫腹輒道飢無

田間詩集  
已聽其去去亦不復追卽今手自錄眼昏指爲腫況已  
心血枯無復敏妙思白非衆思集獨力焉能尸人情久  
厭倦歲月徒虛糜以此常輟卷輒思還茅茨故園久不  
歸松竹無藩籬亦恐兒失學可惜聰慧姿家食豈不苦  
受餽殊忸怩所慮負盛心欲去行且尼望君勵夙志勿  
令成績墮南浦有潘生述作意孜孜委之使采錄不用  
煩有司建陽百里近昔賢文在茲吾欲親訪求因以攬  
武夷夏秋倘卒業客亦無久羈願君成此書名德千秋  
垂豈如諸治蹟區區載口碑君今四十一膝下已含飴  
厥孫又英物聲如踞地獅樂哉飲我酒我還進君規君

得天者厚一門福履綏元氣旣已固神氣亦勿虧讀書  
聆大要爲政挈綱維美名寧有盡好盡亦爲癡雖爲衆  
人羨亦爲至人訾精力甚可惜毋事自煎剝今君正盛  
壯已白數莖髭祝君常取逸望君常守雌長生豈有術  
却病寧假醫老氏嗇爲寶吾道滿宜持吾言無倫次字  
字出肝脾書之藏君笥卽作獻壽詩

贈吳在茲

芝城來去客紛紛怪我羈遲更有君旅舍盤餐資筆墨  
交親供給有煙雲鬚髯白爲勤工畫僮僕飢嗔賤賣文  
好士祇聞程貳守時勞損俸與平分



初度日放生池禮佛承潘儼思吳湯日陳二如  
過存併呈一拙禪師

年年此日迴增悲況是將衰久客時母難自應投佛懺  
朋來曾未與僧期郡書莫就歸難得家累新添悔已遲  
檢點風光疑盡失重開生面仗吾師

侵晨出郭禮祇林避客偏承客屐尋旅食相憐鄉誼重

謂湯日窮途共事友情深謂儼桑弧已謬平生志疏水

聊存此日心最是餘年勞猛省梵鐘初動晚堂音

送別潘儼思回錢塘

蕭蕭孤櫂倚沙頭抱病還成失意遊詩句酒盃餘半載

圖書藥裏只扁舟故人誰賀王舍火

家信到初被回錄

客路休

添潘岳愁羨爾輕裘容易去却憐多累苦淹留

桃竹杖分贈友人有詩見酬依韻走和

雙峰桃竹杖老去節彌堅過水欺春漲尋山狎雨天分

爲清暑玩預結翠微緣詩卷時堪挂寧憂乏酒錢

來詩有獨

恨挂無錢句

江在涓少文邀同過永安寺訪無可師因隨看

白雲寺關主融相卽事

大師栖廢院夾路芟荷香有客耽禪悅邀予問講堂徑  
通鄰寺近關坐一僧涼日暮忘歸去煎茶話正長

我留僧舍宿君赴禁門還翻笑同時客猶餘二仲閒談  
清一夜夢回破十年慳無公爲予作寒林學易圖此意應相如來朝  
又叩關

同李磊英尋城南煨者茗飲

城南喧隘處中有逸人藏業自遷來習漳州人遷移建寧茶分

識者嘗品泉師陸羽鼓煨憶嵇康坐近爐邊火偏生兩  
腋涼

放生池同方樓岡暨在澗彥博坐溪中石上看

月

山色當門古溪聲出院長世情僧自熱官相客難忘選

石邀孤月攜鐺上小航禪衣還借著卽恐夜深涼

巨石中流穩相從次第攀興隨才子發坐讓老人閒在澗

彥博自拏舟過溪月碎一灘上燈明雙樹間各誇遊歷勝鐘動

不知還

陳二如見過小飲

我滯將三載君來又一年授經心漸懶脩志筆空懸出  
入客隨意杯盤興偶然細聽談杜註此論定須傳

書建寧府志後

死事前朝彥於今載不妨自來非改革胡以別忠良正  
朔相承在殘疆未盡亡如何同逆命一槩沒幽光

戊子城屠日鉢鋤豈記名卽應諱國事何至匿家聲士  
隱疑無罪女貞合共旌幽芳不許闡難解此人情  
此邦儒戶重歷代報先賢優免朝廷典源流鄉里傳已  
聞多濫冒何意更夤緣竄籍爭求入官教付史編建寧儒戶  
優免最厚頃有別郡儒裔遷建者冒建儒戶可乎  
篇章須紀實撰述豈無才事已兩朝缺書需八邑該移  
文詞祇費任事志全灰惟見松溪令篇篇手自裁

建寧竹枝詞

一雙小鳥號相思放出雄飛苦戀雌若使放雌飛便去  
人情大抵似君癡

開元寺宇最稱雄故宅今神說呂蒙對岸關侯祠廟冷  
時聞甲馬鬪空中伽藍卽呂蒙云寺爲蒙宅

山城遊女半吳粧嶽廟新秋花滿廊聞道昔年秋更盛  
過橋爭進廣南香

橋南光孝寺僧稀喜見當門樹十圍大殿荒涼曾駐蹕  
行人指點淚沾衣

都司廨廢地形雄云是閩王昔日宮尚有香爐移不動  
至今猶直殿當中

尚書臨死氣昂藏談笑衣冠赴法場通市人看爭墮淚  
只今說作府城隍謂揭萬年

梅岐里下收銅板

布名

拱北城根買建蓮腐乳定尋光孝

寺合香須過廣門圈

萬落千村不起煙家家說欠靖藩錢新投惡少名初挂

虎嚇鄰居要婦眠

合屬官僚上賀新爲聞憲府誕麒麟一雌墮地何曾育

收賀完時說與人

太守新來清絕倫只苛屬縣不苛民縣官家遠無錢至

仍出心憐百姓身

梅影樓爲賈叅戎賦

建安將軍軍府寬建安無事將軍閒府中有樓時宴客

登樓恰對梅仙山梅氏子真漢高士一朝變姓逃吳市

入閩學仙事渺茫丹竈丹井都在此將軍坐鎮保上游

梅尉隱爲一身謀區區挂冠何足道姚子題名梅影樓

人生仕路苦鞅掌入世要存出世想將軍不學梅尉仙

但對此山生嚮往將軍煉德不煉丹功德滿日爲仙官

與民同享長生福不似方士空驂鸞

黃連生初度

好士平生志況憐山水清偶爲南劍客忽滯建安城鄙

吝消黃憲疎狂恕禰衡居停聊暫假意氣早相傾覩縷

前朝話周旋異代情品原稱國士德自有家聲經術今

方賤儒脩世所輕循資登歲薦罷對棄時名宅空尋山  
住田多少佃耕吏呼增賦稅公謁懶逢迎一郡推前輩  
同人得老成纂脩勞采輯議論貴持平共凜春秋義寧  
寬月旦評思存高士傳難與俗人爭花甲期初屆少微  
星正明庭蘭滋露茁巖桂着霜榮介壽村醪熟稱觴戶  
屢盈交歡唯數子讌集盡羣英詩必矜新句飲能勝巨  
觥君爲圯上老我是漆園生率意禮無禁雄談坐任驚  
籃輿如可命爛熳醉柴荆

人聞、爲黃連生題画

翠壑蒼崖錦樹斑秋光一片鑠巖關不知茅屋藏何處  
定有高人住此間瀑布聲中采藥去老松根下放船還  
船頭坐者無他往直到灘頭倒看山

贈楊織人

楊子家聲清白遺親朋盈座酒盈卮不平語卽當筵發  
半醉音於隔院知書每借人殘善本米時分客忍朝飢  
腕蘭珍惜蒙詒贈欲趁歸裝是此時

示徐又橫

郡志須分任前賢待表章頗聞持論正早被指名狂有  
諱文應避無私直豈妨相期成信史今已盡韜藏

假寓楊隆吉高齋旣別奉酬

田間詩集 卷十四  
居停纔隔巷假館不時來以我展無定令君局晝開持  
家難好客破例爲憐才寂寞論文酒何時更把杯

送別程姜若司馬入覲予亦言旋

兩載芝山客交情久益知館餐曾未倦應接渾忘疲巷  
僻停車久杯濃出署遲秋風分手後何處不相思  
此別一何遽馳驅入覲年山川嗟遠道鞍馬逼寒天也  
識家偏近其如病甫痊賢勞君自慣親故獨心憐

別魏叔采昆仲

魏家兄弟並清姿接坐常親玉樹枝家政平章惟聽長  
庭階倡和自相師杯濃勸客常先醉茗熟敲門若有期

別後梅花當檻放新詩何處寄相思

別嚴志先

志先初自  
白門歸

負郭園廬一徑微每來小豎早開扉半年江國遊何速

三載閩溪客未歸寄跡芝山饒臭味娛親花圃正芳菲

陳髯最有通家好別後休教屐齒稀

二如與志先  
尊公交好

孟冬同無可師訪報親菴過同由里

柳巷凋殘兵火餘穿橋比舍盡臨渠暮年喜識先儒里  
老友邀尋開士廬風俗向來尊佛法人情今欲廢詩書  
太平想見絃歌接半是名流此卜居

孟冬同無可禪師李磊英居士遊武夷山

田間詩集 卷十四  
萬年宮外筏初齊緩棹言窮九曲溪雲散曉峰嬌玉女  
日窺仙洞伏金雞荒亭幔撤稀聞宴絕壁虹收尚可梯  
賴是山人親指點花源深處不愁迷

碧樹霜餘半嶺紅冬晴乘興遠公同懸崖躡屐攀真慣  
淺水浮槎去僅通題句苦遭游宦客辨訛須問住山翁  
大師選勝思栖隱勸我休心老此中

翠壁丹巖盡可憐大都奇絕在溪邊石銜宴散虹橋板  
崖架撐殘鴨母船壑轉祇求容水過峰孤不屑與岡連  
此間曲折如何画回首屏風意惘然

將衰莫笑入山遲且喜無勞拄杖隨遂有人居接筇上  
幾番期訂喊泉時宦遊舟過惟循例土著年深不解奇  
自是黃冠疲應接許多佳勝漫教知

層層青嶂插天遮況是初冬日易斜無處四時無霧雨  
此山終古此煙霞燒丹術絕惟修藥住靜糧慳特賣茶  
何事好奇李居士白雲窩裏竟移家

老健休疑上嶺難到來眼界已全寬坐觀雲起溪山合  
臥覺天低星斗寒松偃未能迴俗駕當路有偃松一株鶴飛時  
說過仙官玉華二隱高如許都在窗前指點看下有大小隱小隱  
峰

聞到天游客罷遊果然此踞最高頭方知曲曲山迴轉

田間詩集 卷十四  
合使峰峰水抱流丹碧  
皴中通估舶煙雲破處墾田疇  
棹歌不向前途去一覽臺邊已盡收

更衣臺對隱屏尊山水周旋勝地存  
龍起偏嗔書有院

茶荒不改御爲園文公書院爲龍所毀舊有御茶園道人霞上呼雞犬

逋客雲中課子孫見說溪源田可種  
攜家直擬住星村

### 酬白雲窩李磊英居士

早歲栖山髮已皤全家隱在白雲窩  
屢遊城市爲官賺

時辦盤餐候客過鐫篆技高酬直少李善鐫篆茶槍價賤贈

人多最憐膝下兒孫衆婚嫁茫然奈老何

### 更衣臺贈藍素先居士

昇仙遺蹟有高臺從此更衣去不回  
磴道祇隨巖叟上

洞門肯爲俗人開林端伺客窺  
漁艇雲外驅童貰酒醅

好是一家峰頂住更無雞犬不將來

### 返里哭方君則

戚友頻凋謝惟君我最悲  
累喪猶在殯老母正垂危  
名

棄愁違養飢驅更遠離尚聞臨死日  
戒勿令親知

去年聞汝病顛顛在黃州不肯貧  
干祿翻教老漫遊債

於身後出事到死時憂久關堪輿  
說憑歸土一杯

### 聞孫易公歿驚悼成詩

旅死亦何恨悲君兄弟俱總爲  
天下士同在客中徂直



道通鄉遜癡腸此日無故人書種在肯令負遺孤

時舍姪授

令嗣經

田間詩集卷第十四

田間詩集卷第十五

客隱集

起戊申止巳酉

寄懷魏子存武部

憶昔南園三載居與君晨夕興何如詩篇謬荷推錢起  
名位寧知讓魏舒老去江淹才欲盡難餘周顛酒全除  
也聞對客頻相念戒我窮愁少著書

生還嶺外臥江村曾有書通司馬門寄訊每勞詢活計  
檢詩深荷匿狂言長篇卽席還能就老眼書經未盡昏  
近日詞壇應獨步樽前無我共誰論

青陽道上

寒驢溪上日初斜此去陵陽界正賒市口人家專哺鴨  
村頭婦女共醲麻頻年奔走嗟雙鬢一路逢迎見九華  
莫道鄉園風土近沿途錯認許多花

客陵陽同增岸汾仲師仲諸子遊仙壇卽事

陵陽山半古仙壇下指孤城似彈丸菜麥畦分鋪地錦

芙蓉峰削插天寒窮鄉幾戶容秦吏邑開自秦時遺跡千年

紀漢官實子明爲漢令稍喜斷碑陰有字掃開苔蘚倩人看

漢家良吏此登仙煉藥飛昇蹟尚傳壇畔井湮騰紫炁

山腰竈墮涌丹泉銜盃忽漫傷前事披髮誰堪禮昔賢

倘遇子明騎鶴返可知今代是何年

訪畢牧牛登御書樓有作

尚書府第縣西頭零落家聲強應酬細草綠延深巷古  
高花白照小庭幽國恩肯向新朝諱故物猶憐御墨留  
更有綸章皆世寶許予瞻仰上層樓

憶內三首

一春旅食滯陵陽辜負家園爛熳芳雨夜難眠憂活計  
花晨懶起憶新粧衾稠久共猶餘煖笥篋親裝尚有香  
最是枕邊私語切丁寧莫棄舊羅裳

別來茅屋已經春遙想牽蘿雨後新絡秀甘爲周浚屈  
文君早識馬卿貧屢從棕水梢家信好指蓮峰望旅人

多病莫徒勤服藥持經禮佛也傷神  
新買湖莊近宅邊出門爲乞住山錢早移桃柳栽成徑  
一任菱荷占却田卷幔看花宜有閣敲針垂釣可無船  
白茅小構堪偕隱好待經營更兩年

咏陳園紫牡丹

陳氏園亭溪上斜新晴初放一叢花憑欄力弱歆朝雨  
映水姿明鬪晚霞傾國自來非正色爲王早是壓中華  
却憐蝴蝶紛紛夢猶認春風屬魏家  
經旬苦雨負春光半日晴烘滿院芳色在齊宮迷小白  
名於姚氏亞深黃九華殿裏偏驚艷一品衣邊但覺香

朱紫近來凌奪久未逢零落已情傷

深紅淺碧亦多姿爭詫根從島上移總在中原稱富貴  
偏矜北地有胭脂欺他宰相袍堪賭映得昭容袖不垂  
極目煙光凝塞上可知此色正當時

濃芳幾朶照溪明也覺繁華擅一城小立朱闌憐燕頰  
忽催画鼓惱蛙聲漢宮寵屋金同賜吳女情癡玉是名  
應是東皇頒特詔墮泥常許帶恩榮

同黃增岸楊嘉樹張師仲集陳園賞紫牡丹

陳家花朵大如盤朶朶開教正面看侑酒羞邀紅粉伴  
駐顏應服紫金丹座中星映光堪摘杯底霞流色可餐

莫惜燒燈乘夜賞芳叢已見一枝殘

寓樓對雨

高樓整日倚溪邊最是冤傷暮雨天野老趁歸爭渡過  
舟人穩泊蓋蓬眠藥需久服初收效酒惡新筍枉費錢  
城上起更何太急攪愁合在五更前

贈黃增岸

黃公俠氣早知名旅食山城志不平客店互過相問疾  
酒盃輪把各言情救飢自合投仁祖謝病終知重長卿  
莫上巨源書太切如今直道幾人行

陵陽雜詩

山城去住久躊躇早是羈栖一月餘米賤僮還思繼粟  
菜香吾豈歎無魚也知患難交偏重惟覺逢迎跡太疎  
咫尺敝廬歸便得茅柴小葺且安居

郭門無地可經行況值春天不肯晴一夜水崩橋盡斷  
連朝溪漲樹皆橫欲尋官閣愁闌吏偶有朋樽礙禁城  
賴是遊人多失意時時買酒與同傾

地主經旬迴未聞怪來請謁尚紛紛客多應使官聲損  
縣僻無勞吏治勤同學自知交不淺買山竊計俸難分  
故人似汝吾猶困穩向江天臥白雲

病餘無伴罷銜盃且喜樓居眼界開山色偶從雲表出

田間詩集 卷十五  
四  
溪聲長是夜深來卷篇聊遣窮途悶交際還憐大邑才  
不爲荒城難久住春耕也要及時回

石經齋值蜀藻初度

五載一相見剛逢初度辰我於汗漫老君以應酬貧竹  
色春來暗松聲別後新晨昏詩一卷只此慰孀親  
高齋吟嘯久又見老狂來榻幾年猶在樽無夜不開論  
交追古道應世亦奇才時命看將轉雄心且莫灰  
時事竟如此升沉且莫論茅齋新換瓦蓬徑乍開門田  
可供租稅家纔半嫁婚所欣佳子弟吟誦滿庭軒

置買湖莊述懷

南遊餘得百金裝爲買湖田十畝莊叱犢怕傷穿漁藕  
祀蠶且護繞堤桑擬開堂戶通臨水更浚溝渠免築牆  
屈指樹陰難得大幾時萬綠映窗涼

共笑平生計疎於今端合老樵漁撐船自趁侵禾鴨  
倚杖閒觀嚙草魚招隱豈無高士至爲鄰或有酒人居  
年來久廢牀頭易只看農家種植書

江湖春漲逐村流孤嶼微茫一點浮履畝自分高下種  
當門閒閱往來舟新荷拂水清三夏早稻登場鬧一秋  
獨有寒冬稍蕭索梅花須種滿山頭

籬邊柳外萬芙蓉盡是江南遠近峰丘壑性靈原自富

煙雲眼界亦全供可知歲月閒纔筭真覺交游老漸慵  
歸隱卽今休恨晚種山猶擬十圍松

湖外山阿萬樹遮尋山只用一舟拏緣坡瘦地應宜竹  
到頂荒崖可種茶地僻惟存樵子徑林深合有老僧家  
何時供佛三間閣遙指湖心看藕花

吾家世業此江邊說起生涯亦可憐菱芡過冬皆是飯  
雞豚入市卽爲錢霜前捕蟹愁無炬潮落關魚祇辦船  
活計筭來通不乏何須沃壤更求田

山一卷多水一灣居然稱水亦稱山惟求樹密常相覆  
那得潮來竟不還蔬圃勤澆僮穉便瓜棚獨坐老人閒

編籬隔水通橋過總設柴門可要關

餘生已分老家園卜築湖中祇避喧每聽惡聲悲獨子  
更憐古道有諸孫課耕半是爲牛馬擺俗應需了嫁婚

聞道清溪深可隱幾時南渡別戎村

買莊時門內聞有  
忌者因不敢居後

竟爲  
所害

### 過七姪蓮子居

吾兄昔愛傍湖居爾又開荒此結廬假僕勤需朝酒足  
借牛力是晚耕餘人稀挈女同澆圃客到操舟自取魚  
亦有小窗容几席毋妨農暇理琴書

### 寄懷石埭令姚六康初度

陵山山下一城偏士俗民風異昔年難得遠村輸賦稅  
漸聞闐闐有詩篇挑燈半是回書札散吏常因辦客筵  
見說來遊多失意終朝愁欠贈行錢

邯鄲有夢忝同登覺後升沉可盡憑我愧荷衣猶作客  
君甘蔬食竟如僧詩囊未削傷時草官舍長懸供佛燈  
但得茅齋容膝足肯將三徑累良朋

旅寓經春溪上樓每聞人士說君愁苦遭惡客不相恕  
深怪長官無厭求邑小未能逃責望名高端合賴交游  
卽今初度賓朋集誰是同聲與唱酬

百家橋訪譚惟石不值

百家橋畔小溪回萬竹林中一徑開處士上城輸稅去  
遊人下馬叩門來園廬直喚山童啓茗果還傳穉子陪  
坐久欲眠歸店宿知君每醉夜深回

重九日陵陽諸子邀同晉江黃原虛新會朱錫  
公暨楊嘉樹張師仲劉吉士汎舟舒溪卽事  
陵陽風氣已將開座上人皆作賦才閩粵異鄉同把菊  
溪山一路可銜盃初弦月趁船頭挂短笛聲隨舵尾來  
醉插茱萸還齒序怪予鬚髮特相催

贈上海陳鱸江

伊昔再爲黃浦客如今總作白頭人試詢老友無多在

通問通家已盡貧夢寐豈能忘澤國交游強半是遺民  
劉侯好事休官早且喜虬江蹟未湮

上海舊令劉公開虬江

九子峰歌為石埭令壽郭昆冶太守

有小引

大江以南山最奇秀者莫如九子吾嘗往來江上望之岬嶸排空揭青天而寒白日太白詩所云天河挂綠水秀出九芙蓉是也郭公昆冶來守是郡越二年政成化洽吾友姚六康為君屬吏繪九子峰以為公壽俾予歌以志之予聞山有九十九峰而統之以九子蓋自雜書用九禹貢誌載皆取諸九九為陽之成數是以古之尊稱頌祝其上者莫不遞進之以至於九蓋舉其成數為言也姚君曰吾公澤被南北望著中外雖大河喬嶽無以踰之豈直與九子峰作鎮一郡表峙於江南而已哉然吾聞古之頌壽者不稱華岱而稱南山豈非以南山近在京邑故即據其朝夕之可見者以頌其君於無疆則今之九峰之圖

猶之南山之祝也因取其意而歌之以侑公觴

九華之峰九十九芙蓉朶朶青可數最高乃是九子峰  
下視諸峰皆培塿峙如仙掌插青霄森似劔鋒寒北斗  
千峰萬峰爭獻奇冠以九子咸頰首郭公粉署舊仙郎  
一麾出作江城守貴池魚美豈足耽所羨茲山為君有  
朝夕看山鈴閣開簿書堆案煙雲走公也為政山出雲  
同為膏澤沾足久公名直共九峰高兄視黃山弟匡阜  
屬吏見山如見公以茲寫山為公壽諸山羅列九峰前  
拜跪能如屬吏否覽圖共笑山不如看山更進一杯酒

皖中酬成一鴻廣文



廣文宦罷興蕭然流寓江城久不旋弟子醵金營小閣  
修羊取息抵良田浮沉市上交疑濫嫚罵樽前性苦偏  
念我平生疎懶甚竭逢多難倍相憐

錫山山水夢難忘底事移居客皖鄉意氣似堪諧楚俗  
衣冠時復倣唐裝課孫自作溫經計賃婢能傳治饌方

膝下營情雙穉女阮郎婚畢及劉郎

公二女長歸阮氏次歸劉

幽栖特卜盛唐山曲巷疎籬不掩關雨過但思談即往  
日斜長是醉言還世情勘汝無多想生計傳予祇一慳  
不是尋君何處去儘教人笑兩癡頑

端居未覺省交遊召客研經共一樓秋至漸看漁火亂

天晴時有鴈聲流異書偶借隨加點佳醞親儲不用謀  
自說學仙無一效年來但覺此心休

酬蔣素書見贈原韻

十年江上逐鷗盟來往江潯不到城講易敢言傳絕學  
吟詩聊可送餘生深慚呂母椎牛義空負楊公舐犢情  
擬卜茅齋同唱和恐添新恨入歌聲

時以號子  
寃滯皖

任克家霄漢樓成索詩

任華高閣頰城開楚水吳山面面迴日射丹題明塔廟  
煙籠碧樹隱樓臺憑闌月湧三江上解帶風從萬里來  
暢好炎天時召客八窗洞啓與銜盃

半帶江流半枕湖此中少得此樓無春雲欲起龍山暗  
夕照將沉鴈汊孤燈火每隨賓客散板輿長共弟兄扶  
臨風忽有吹簫興黃鶴天邊似可呼

煙渚迷茫一氣浮江聲樹色海門秋置身祇覺雲霄近  
傾耳疑聞河漢流沙上渡迴欹浪過雨中帆滿趁幫收  
何人不羨任公子日日垂竿坐上頭

虛堂小院趁幽情忽與攀梯上界行市井柳遮窺檻出  
山城雨暗隔江晴空中結構多時就宦後優閒早歲營  
吟罷新詩十六首白頭才盡和難成

克家有落成詩十六首

### 贈汪子倫

不見汪倫三十年支離猶帶向來顛雄思側眼青霄近  
老態低頭白晝眠家事早交才子理客情爭恃內君賢  
虛懷謬嗜田間集每日逢人誦幾篇

相看大抵髻如絲跋扈飛揚憶昔時酒興減因豪太過  
病根伏到老纔知樽前諧謔機鋒在戶外逢迎步履遲  
念我傷心時搯擘每談血氣動鬚眉

### 月夜過沈氏江樓

何處堪乘月沈家樓最明晚來江更大秋到水初清遠  
火移時隱孤舟犯夜行市門催客去早是起更聲

### 過張氏圓通菴

瓜藤豆蔓滿柴關新構精廬萬竹間半載有期常負約  
一秋今日始偷閒叅方笠挂留難住時住山僧欲去監院廚荒

出未還怪是入山偏值雨山神要遣聽潺湲

季鷹宦倦早知歸佛刹重興願不違為塑神僧祈法雨

舊有僧祈雨甚靈今塑像於此特迎上座闡禪機馬隨牛跡尋山近虎

聽魚聲過嶺稀到此狂心應暫歇夜深相對一燈微

劉泰齋初度同二鴻即席

鴨兒塘側訪柴荆秋雨剛逢初度晴坐上項毛看並白  
燈前眼力訝偏明心栖淨業常尋寺跡溷時流不入城  
老友攜樽期共醉更勞添酒話平生

憶昨中江幟早攀盤匝曾得奉周旋論交忽漫過三紀

自癸酉訂交今三十八年矣序齒剛稱長十年愧我無家重入俗多

君有道不逃禪觀空兼得長生訣要妙何時附耳傳

雨過苔痕滿院侵幽栖餘有道人尋入山竊附逃名志

傍郭還同遠害心酒後狂言容謔浪門前緩步筭登臨

何緣卜宅相鄰並日日追隨澤畔吟予頃因盜害困院泰齋亦以被盜移

近城外

先生高節古人儔要數吾鄉第一流陶令菊荒三徑晚

邵侯瓜熟滿園秋官家課稅偏應重胥吏侵凌莫漫愁

垂老翻添兒女累幾時纔遂向平遊

酬秦齋二鴻過江樓小飲卽席和韻

小閣含風秋欲闌，驚濤千頃靜中觀。  
攀梯窳窳勞高屐，捲幔依違見遠巒。  
虛擬琴高能控鯉，也知梅福竟驂鸞。  
從今姻婭稱三隱，文酒追隨歲月寬。

石門湖歸

萬頃湖藏石作門，一溪疑到武林源。  
漁舟近岸聞雞犬，馬鬣無碑問子孫。  
內多塚墓籬下鹿馴依獵戶，樹根牛臥認  
煙村。老農有飯留田主，濁酒頻添注瓦盆。

扁舟一宿石門湖，返棹沿洄日已晡。  
水落苦愁河路曲，橋崩深念渡船迂。  
沙邊蟹火沿途導，澤畔漁家記姓呼。

夜半虎行扉不閉，酒醒遙見月輪孤。

大觀閣示王雲馭

老兄俸薄官廚儉，令弟單栖署閣寒。  
身健欺風窗不閉，夜深得酒寢偏安。  
飲徒素怯稱雄易，碁敵非勅賭勝難。  
閒鎖雙扉時出郭，秋山一帶盡情看。

九日偕諸稚登郭外山

連朝陰雨困江隈，向晚雲收霽色開。  
穉子卷書思過節，老夫放假與登臺。  
興隨鬢髮年年短，愁逐潮流夜夜來。  
却望故園腸斷盡，庭階無復菊花盃。

家湘靈書到寄示哭爾止詩卽成三首

仲文書至語堪悲遙寄秋風哭友詩早見病深催棹返  
爾止在皖得病予與二鴻促之返誰知客死到家遲嗣孫賴得扶持去  
爾止甫嗣一孫隨之東下妻女曾無訣別辭珍重平生諸橐在篋中  
零亂莫教遺

扁舟西上滯江濱值我奇冤恨莫伸老去共知心術正

難中吾見友情真一觴一咏完千古同學同年剩幾人

予與爾止湘靈皆同壬子生後事好煩王逸少王安節為爾止愛婿他鄉寡弱

復誰親

握髮論交四十年詞壇並駕苦爭先先生還嶺外情彌篤

死別江頭色可憐晚歲忤時談字學爾止老攻字學每與人辨一生

得謗在詩篇塗山有集君須訂好是精嚴使必傳

### 聞雷

老臥滄江萬慮灰天心人事迴無猜冬暄忽作傾盆雨  
日暮驚聞破柱雷民物關心妨有厄國家應運豈愁災  
昨宵炎熱今晨冷變態真宜付酒盃

### 同成二鴻大雪節訪黎天錫卽事

城上烏喧雪候新衝寒有伴覓同人楸枰遇敵爭碁冷  
藥酒扶衰索醉頻預勅門無辭老友常留榻以待貧親  
好施不爲忘恩倦纔信平原意氣真天錫門多故人子有背之去者復來

### 宿張慎菴舫亭

獨宿江亭夜不眠濛濛沙渚宿寒煙月高負郭爭鳴析  
風靜中流穩住船往事已成莊叟夢同人猶話義熙年  
自矜老筆猶雄健草草千言一郡傳是夜皖中諸君  
屬為郡守誄言  
遇四明徐虞尊談及往事有作

四明羈客皖公城邂逅江樓識姓名為聽鄉音詢老友  
細談家難卽賢甥捐軀早信談兵日絕命猶存罵坐情  
苦趣似予嘗已徧較渠貪得幾時生

坐汪子西京寓齋看雪二鴻亦至

面郭高齋眼界寬北風吹雪白漫漫經冬始覺天時正  
逼歲無言客路難飲量未充重覓酒熱腸相對早驅寒

廣文乘興衣冠古粧點唐人畫裏看

歲晚寓齋有作

高居軒豁俯江關雪阻同人聚此間兩岸白平微見浪  
千峰青沒不知山深憐渡馬空村避時皖中養馬  
將渡江而南猶見  
征帆逼夜還誰肯歲除甘作客擁爐餘得客中間

皖中除夕

雪暗荒城競歲華千門燈火望中遮童憨犒酒忘為客  
婦病圍爐苦憶家稚子可知懷旅店孤孫應是哭江涯  
故園此夕腸堪斷愁聽樓頭更漏餘

傷心言

康熙七年十月二十四夜盜殺吾子孝  
則值澄偶出縣令胡必選匿不上聞澄

歸力爭之漸為諸上臺所覺乃撰誣詞圖塞盜案澄老病衰迷無力上控天道甚邇公論自存澄惟伏地吞聲以聽冥報而已

吾兒遇難已經年飲泣終朝痛未宣劫數也應容孝子報施不敢信蒼天細推骨相無凶法檢點平生少罪愆莫是還家忘毀戒佛前未懺牒空懸兒在閩曾受戒既未懺故罹此死後戒牒猶存

震澤單單脫網羅依然橫死可如何震澤之難兒母及弟妹俱死兒獨免刀兵漫說皆前定罪業還疑自我多巾笥書殘誰替檢草堂僧住忍重過月明獨向墳頭哭聞兒母墳上夜有哭聲曾憶

松間共嘯歌

自傷前路黑冥冥大事叅求苦要惺兒與姪龍友言前路冥冥相期苦叅詩句偶成隨棄稿俗緣難斷且持經日與龍友跪誦諸經夢能認我元無死報亦依期似有靈兒死後現夢於予言死者非我且微示以報復之期夙債償完兒好去若翁腸斷哭誰聽

出入兵戈萬死餘餘生只擬舊田廬家庭敦睦全由汝客路艱危屢諫予每憶良規防薄俗豈知奇禍是安居最憐身後逢官怒一死鴻毛恐累渠

孝友平生鄉里知身殲贏得路人悲病終不過嗟無祿逆死還應痛有期盜去暴屍情太慘兒死後重官聞加

罪事真奇多生何業深如許聚合冤仇在一時

難日偏乘我客遊計傳通國淚爭流如何十日纔聞上

妄說三人共報仇見以十月二十四被盜至十一月初五縣報刺死又只報三人決定

賊虛寧有見以失單為虛懸知事秘豈同謀無計諱盜乃云兒死

事屬羣凶遠縱官無據園土惟將小豎收拘兒小童收獄中

紛紛羣盜已逋誅官吏加誣毒更逾篤行豈應如此報

奇冤卽恐自來無夜臺鬼近還容訴人世天高不敢呼

我老諒非相見遠呱呱愁棄兩三孤

制臺符下見如神謝事空勞洞察真蒙郎督嚴駁隨以解任去付之不理

盜律過嚴偏諱盜人情可弱益無人仇曾不問加汗鱗

死亦何辜可怒嗔夜半官來棺自剖誰容屍見白頭親

予在府候審縣間夜半遣官開棺相驗竟不通知

幾番更計議紛紛責在須教大吏分朦朧上官審定成案怪底簿

詞頻改撰原來案牘總虛文訴冤有主能無問讞獄何

言迴未聞凡庭訊予從不得面質解上亦不檄予到即使減三難指盜豈應

行刺可成羣多兇減作三人謂三人不成盜三人可行刺乎

黑霧漫空咫尺迷啾啾冤鬼向誰啼苞苴祇為微官計

線索全憑老吏提有老吏作奸四十餘年恃為謀主擔卸高肩真得計

金藏狡窟不須齋府有蠹吏穴重資陰為縣左右可憐衰腐勞全力緘

口今生敢更題

山城聞變卽歸來枉以虛名早見猜馬上調符催卒返



燈前授旨許囚回

令初以遣捕聞予至反掣回又夜提燈至獄門諭盜黨如所指許即放還

共知駟猶傳家法敢信犁牛是盜魁生死遭逢皆此輩

教兒何以瞑泉臺

令家世駟猶有言其翁亦盜故庇之獨力

也知汝輩官偏重底事吾人命特輕國法可宜全倒置

良心或恐尚分明讞嚴祇據含沙甌

縣以私札言予之過庭讞時引以為

詞黨眾通加弑主名

盜守門者十餘人入室者三有太遠房僕在內乃盡坐家人弑主

守無私公道在仍存疑案是何情

刀鋒火炬列成行画臉朱髯刺客衰

情形如此乃稱刺客劫質求

金嫌入室殺人流血怪侵牀

盜縛兒入予室逼財不遂被殺以此欲成疑獄渠

兇到即填牢戶胠篋緘猶挂屋梁

獲二盜即時斃以滅口而贓物滿籠尚懸

保甲

聞說家庭虧子道人間豈信有綱常

令翁每至署輒詬厲而去

屍橫血濺舉家空稚子何名繫獄中黃口聲嘶憑煨煉

青天手障也朦朧情知迂拙機偏捷事苦彌縫計未工

乘予暫出獨解久禁小

僅教成誣詞以誤上聽敗漏正多渾不問金錢自信有

神通

老病誰能叫九閻世間公道亦空存朝廷法重徒滋弊

制府符嚴祇益冤

蒙今督憲嚴駁乃反坐以奇誣

吾口難箝應得罪盜

名妨觸是何恩從今白晝無人問竊恐萑苻嘯漸繁

紛紛伏莽任縱橫桴鼓宵藏敢夜驚致我一門冤最酷

要渠萬戶啞無聲詞卑漫信仇能報計毒翻因賄不行

予入省遣吏甲詞求解誓為獲盜先已墮術中今悔晚  
是遣某吏行成予叱之因防予益甚

教人罵煞老書生

新頒律令限猶寬漏網雖多捕不難非盜得情休滅口

毀賊何物尚經官獲二盜即斃杖下但求伏法情甘罷

其奈臨供實不謾盜供初已改讞詞誰辨得更仇枯骨

特無端

看君塞默自多慚奸吏請張律久諸法網明開休踰六

辨端早伏只稱三令有七強八盜及三人不為盜之說

以致劫獄予家亦只勒報三人大庭屏衆機何密官舍輪誠語太甘親

甘言啗予死者受誣生受辱人情到此豈能堪

盈郊縱劫荷寬仁轉恃恩多殺害頻渡口婦空捐六命

烏金渡吳氏被劫殞獄中卒又斃三人魏氏盜殺七人

三卒巢依近郭應全覆盜窟近事發南湖且盡泯南湖

而逃盜供出所劫吾邑方氏似此蔽天非一掌吾兒冤恨教

誰伸

田間詩集卷第十五

田間詩集卷第十六

客隱集 庚戌

庚戌元旦一指巖書金剛經

早起風恬雪滿局春城鐘鼓最先聽  
模糊萬里江天白  
掩映雙林佛火青  
已勅齋廚通禁酒  
況逢僧舍請書經  
竹窗洒翰還如夢  
四十年來此再醒  
予以壬申年書經  
今三十九年矣  
月下二鴻醉後邀同舍姪閒步

逆旅門惟閉良宵恨轉增  
一樽諸子共餘興  
老翁乘懶對傷心  
月偏尋敗興  
燈可憐俱老健  
攜仗不煩憑

元宵前三日寓皖上舍姪雪公五十初度并示

四姪介公

吾家逢此厄運也可如何孝友人虛譽賢勞汝獨多傷  
 心初度日流涕旅中過忍憶庭階集樽前共笑歌  
 去歲秋風後阿廉正四旬可憐失意日來叩斷腸親祇  
 益吾兒痛休傷汝輩貧今晨同聚首相對淚痕新

寄毛恭則憲副天津

天南仗節舊勞臣回首風煙二十春端水序分鴻鴈杏  
 灘江書寄鯉魚頻長憐絕塞詩篇壯可道中朝遇合新  
 笑我困窮成底事祇餘雙眼望交親

趨朝爭避惠文冠昵我狂談每夜闌雅調同時推北地

楚風不自黨公安蠻中書少尋思得馬上詩成認橐難

恭則詩數十首錄方寸紙上人不能辨

把去新篇通不語賞音直待再三

看到桂林貽書稱生還集

百折平生志已違西山何計出重圍滇南事去班行盡

嶺外人回故舊稀每痛吳郎無櫬返

謂鑑在

尚聞袁氏有

孫歸

開特丘還甲贖歸一孫

天涯可信狂奴在白首銜愁守釣磯

灤溪訪江在濬道上即事

津城雨住徧春泥路過浮橋問灤溪溢浦水添新漲闊  
 匡廬雲截曉峰齊掉頭帽為看山側勒馬韁因戀草低  
 想見江淹詩興勇清篇多在筍輿題

短橋瘦馬日將斜遙指孤城路不賒  
麥隴離披傷雨葉菜田零落隔冬花  
隄崩迂轡尋荒徑水涸牽舟覆淺沙  
一帶炊煙知近縣鼓聲應報晚陞衙  
經旬陰雨不知春入境欣逢霽色新  
時事自宜安小邑山川何幸得詞人  
詩於作吏偏增妙官比居家似更貧  
莫謂此鄉民俗獷也因清白漸知馴  
落落官衙草市圍宦遊心事已全違  
地偏且喜逢迎少俗陋惟疑唱和稀  
時埽高齋留客榻聊資薄祿奉親闈  
逋租徵罷庭無訟彩筆花存任意揮

寓熊氏東臯

小築東臯一水環編籬護竹隱柴關  
短橋導客穿三徑丈室邀僧住半間  
燈火每偷深夜坐酒盃恰趁雨天閒  
溪聲徹曉牀頭吼疑聽奔泉萬仞山

潘澹生索贈

城西大宅半荒墟中有幽人小閣居  
好潔市塵行亦少耽閒官長見全疎  
看山屋礙惟張画映日窗明獨點書  
更羨內君承雅志茶香酒釀手親儲

甫抵德安覓彭然石卽遇喜極有作

汗漫尋鄖渚維舟問所思僕夫聊遣覓  
老友若相期鞍馬衝泥至形容覲面疑  
一時驚喜極不暇訴心悲

賜斷灘江別倫生二十年僮奴一半在故舊幾人旋寄  
我書隨荅懷君詩已傳最傷添老淚猶念小兒賢

同然石出西郊卽事

旅食春深可耐閒偶同鞭轡出西關許攜酒榼金泉寺

悔失桃花白兆山

白兆山卽太白讀書處桃花最勝

門叩官堤榆筴裏

馬尋岐路菜畦間人家不省臨溪住可惜沿城水一灣

太白樓

鄖子城西太白樓登樓遙指碧山頭桃花帶雨年年放  
澗水無人日日流名士有詩存一首此鄉勝蹟已千秋  
老夫醉亦能高詠可許書題壁上留

碧霞書院爲高雲旂太守賦

鄖州城畔碧霞臺遺構荒頽此再開雲帶遠山江北盡  
樹籠春水漢東來秋成好看盈郊穫夕照時銜醉客盃  
期我登樓應有賦白頭無復仲宣才

返漢口不及抵寓寺野泊懷若朗

兩日江程一日還雨昏猶見漢陽山行人趁夜思投宿  
榜客收帆畏上關野寺鐘來津市近晚堂課畢老僧閒  
懸知茗熟圍燈坐可道孤篷滯此間

南塔寺

卽古臨臯

臨臯南郭寺古殿入頽垣白晝僧徒少黃金佛相尊樹

田間詩集 卷一  
根欺宰堵帆影過山門隔院鳴鐘板威儀恐尚存

安國寺即事懷晦山大師

出郭偶尋安國寺登樓遙憶晦山師已成覆院千竿竹  
悔失當門數畝池師種竹已成陰門有池為俗僧占買去得法比丘行托

鉢寄單居士臥吟詩懸知靈隱秋光好正是蒲團厭客  
時

赤嶼亭

勝蹟荒殘古郡西同遊先後事攀躋看碑不覺千帆過  
拂水遙憐萬樹低詩酒性情吾道在江山面目向時迷  
地名偶被蘇公誤橫使周郎滿壁題

郭外虛亭逐伴過坡仙遺蹟滿巖阿黃泥也覺名殊古  
赤壁何妨事偶譌買酒乘舟樊口近看山隔岸武昌多  
當時只有吹簫客那得狂生共放歌

洗墨池

宋別駕牧仲營麓池前後構雪堂竹樓

天寧寺側宋賢祠帖石新鋪洗墨池注易豈能超象數  
相傳為子瞻注易處子瞻不解象數通經終不合時宜半生筆硯孤臣罪  
一滴淋漓異代思更喜竹樓堪聽雨雪堂壁上少題詩

贈米二岳三岳自滇回寓居漢口

米家兄弟奇男子萬里生還天盡頭白首泥塗逢漢口  
青春劒佩憶端州豹城異代家難認馬革當年志已休

看爾窮途攜累重不堪憔悴楚江秋

武塘友人為相如解裘貫酒賦因綴次其事戲

題五首

成都才子宴華堂錦席無端綠綺張置酒祇知為令客  
窺簾偏是悅貫郎姮娥有路曾奔月織女凌河豈限梁  
多謝臨叩繆恭敬殷勤特為兩人忙

四壁雙栖慰語頻多情無怨暗傷神心憐病免難從宦  
眼見貫雄不耐貧車騎謬矜遊子壯衣奩重憶嫁時新  
也知歸去王孫賤要到成都作富人

倦遊餘得鸚鵡裘解去聊為一醉謀縱酒莫添消渴症  
典衣欲破遠山愁琴存綠綺音堪戀賦直黃金價莫酬

犢鼻已拚親滌器客裘應是不須留  
奔去歸寧計已迂不才最是自當爐共羞重客為傭保  
爭惜良家嫁酒胡市上數錢傳姹女陌頭下馬看羅敷

芳心更有琴挑者未審相如見妒無  
自倚嬋娟更解音如何不繫宦遊心儘拋田宅常為客  
愁向人家又奏琴取酒漫虛皇后賜賣文祇易白頭吟

茂陵聘妾傳難信只信登徒本好淫

太真出浴圖 小引

圖作小殿画屏銀瓶珠樹蘭湯浴罷芳澤如  
存起立屏間以雙手挽巾自拭雲鬟欲亂寶



日問詩集  
卷一  
釧未除酥菽微墳纖彎剛穩下單薄綃髮髻  
可觀旁列三侍女一擎盤盛漱具欲進一捧  
襦以待一持團扇却立不前膚容玉映意態  
若生真蕩心之尤物誨淫之治史也邸中無  
事爲賦四章聊遣閒情用消  
永夏比之博奕敢曰猶賢

洞房春煖浴初闌小立屏風漫怯寒瓶隱花光羞映玉  
湯餘芳澤不因蘭也知脂滑巾慵拭其奈春融汗未乾  
帶繫薄綃遮底事爲防天子暗中看

娉婷出水倚風流金殿珠簾懶下鈎賜餅君王曾慣見  
貼身宮婢欲誰羞豐憐腕膩難鬆釧弱怯鬟多未卸頭  
一自華清同浴後白雲鄉已遜溫柔

一枝紅玉出冰壺解佩凌波得似無閨殿生憎遮寶扇  
薰籠慢勅進羅襦沃餘新煖疑酣酒凭久微涼已凝酥  
怪是纖趺平貼地盈盈不遣侍兒扶  
最嫌脂粉澆傾城浴殿亭亭洗出清雪以沃湯爭護惜  
花因濯露倍鮮明喚他碧玉年偏小厭說昭陽體太輕  
老去畫圖魂欲攝上皇爭怪不癡情

武昌署中對雨

高齋軒豁抵山居樹色峰陰入綺疏樓近漫邀文禕鶴  
幕閒空食武昌魚陳思賦罷才猶湧謂曹無忌官貧容  
有餘却怪楚鄉醕酒惡不堪醒對雨來初次典

鄂州山水向來奇深閉官衙總不知隔院歌聲憐翠袖

登樓樹杪見紅旗情懷作惡難尋酒心血全枯怕看某  
況是打窗連日雨消愁剛有論文時

武昌署中集呂仙祠

幕中客病起  
酬願分韻

呂公祠啓署齋巔稽首苔階禮大仙旅客臥疴初起日  
山城淫雨乍晴天吹簫跨劍江樓近買酒題詩楚俗傳  
今日可能邀一醉青詞應已徹香煙

又和張石徂韻一首

此去仙關隔幾重瓣香應透白雲封醉吟祇是人間酒  
來往寧須海上峰作客易悲偏在楚爲儒多難莫如儂  
乞君枕作邯鄲夢睡熟城頭漫打鐘

武昌試院望黃鶴樓作

黃鶴凌空入望頻登臨虛擬大江濱楚王臺廢風猶壯  
神女峰遙雨正新鎖院操觚悲往事憑闌吹笛憶仙人  
庾公不淺南樓興許到清秋放幕賓

永州石硯

片石離離碧玉姿湖南山色坐中移老夫得此全無用  
携向秋窗註楚詞

武昌明遠樓

層樓三伏八窗開頭白山翁逐伴來湖汎晚涼當檻入  
江懸清影抱城廻憑高總豁衡文眼攬勝遙憐作賦才

好待月明殘暑退羣公乘暇再追陪

試院聞蟬

高樹一蟬鳴同時幕客驚已知更物候且喜是新聲咽  
人文心苦吟矜使院清衰年容易感早動故山情

黃鶴樓同左子直孫威公鄧斯及夏振叔諸子

卽事

黃鵠磯頭四望開登臨千古客心哀山迴大別橫江抱  
水過巴陵坼地來帝子騎龍終不返仙人跨鶴幾時回  
憑高莫話興亡事白首青天酒一盃

鄂渚逢秋秋早清登樓面面見空明磯邊日落千帆渡

樹裏湖通九派平坐對晴川虛閣敞喧連漢口晚煙橫  
昔年仙客經過地夜半時聞鐵笛聲

三楚風煙此最佳客來空憶昔豪華漢陽樹盡餘衰柳  
鸚鵡洲沉長白沙故國粧樓歸道院異時宮闕建軍牙  
擬將遺蹟詢酤叟無復臺邊舊酒家

自昔臺邊酒味醇呂公買醉往來頻笛從竊換仙音杳

舊時鐵笛每夜有音爲人竊換枕到眠酣世界真亭有呂仙臥像伐去棗枯根

不朽擲來桃爛跡如新相逢指點多靈異游客還疑晒

道人

仙棗亭有晒道人

晴川閣卽事

日開詩集 卷一  
九  
峒峩虛閣竦晴川棟宇經烽故巋然漢口人家秋水裏  
武昌城郭夕陽邊湖光面面疑無地帆影茫茫欲到天  
黃鶴望中山色盡幾回芳樹憶當年  
高閣凌空水上浮湖湘九派坐中收天清隱見黃陂樹  
日落蕭條大別秋悵望楚宮悲浩劫閒開禹廟對安流  
山巔風急遊人怯脫帽吾須到上頭

爲邯鄲溫進士母孺人七十壽

武昌院裏秋風早登樓四望雲山好漢口驛路走京塵  
令人却憶邯鄲道邯鄲道上車馬喧溫生城中獨閉門  
弟兄耕讀家聲舊辛苦成名母氏恩武昌文衡君座主

蓮幕邀賓同入楚朝夕點閱不辭勞敢負當年母教苦  
卽今母氏七十秋佳晨猶向武昌留戲綵不逐斑衣隊  
瞻雲祇上黃鶴樓黃鶴仙人正酣寢支頭仍是邯鄲枕  
枕中有路到君鄉附書與仙仙自領棗根桃核石間新  
仙蹟明明報老親併將鎖院茹冰意說與高堂九膽人  
留別魏子存學憲

使君春到楚雲開白首狂生入幕來身老尚爲無忌客  
眼空偏賞仲文才授題豪奏皆稱善促膝言多迴不猜  
最荷故交推分遍叨霑已勝滿裝回

四海相知一子存千秋汝外向誰論談深儘犯當時諱

客賤還因老友尊薄俗共驚車笠誼素心豈重解推恩  
還家擬建存心閣從此飢驅不出門

留別詩三首

蓮幕星飛秋漸殘同時惜別駐江干東還月照孤帆遠  
北去霜侵匹馬寒官舍放歌常共醉驛亭高咏與誰看  
信陵好客如今少莫歎天涯行路難

溫虞南

詩卷情親近一年看君兄弟意蕭然尋山命展清秋日  
鎖院聯牀酷暑天閣裏酒殘樽未散樓頭客去月偏圓  
官衙旅舍相鄰並來往經過亦可憐

魏州來兄弟

庾公賓客總翩翩博物耽奇有茂先把酒恢諧期盡醉

聯牀轉側不成眠霜清月滿辭油幕水落江寒趁米船  
君到西泠逢老友爲言狂態遜當年

張石磁

過九江雨夜同子直宿文燈巖湖上書齋子直

病

檻外平湖湖外峰繞窗青列萬芙蓉何期剪燭同聽雨  
忽訝披裘早禦冬坐有僧談茶沸久爐因客病藥香濃  
明朝便逐孤蓬去回首煙雲隔幾重

鍊師紫煙索和咏雪詩次韻

舞絮紛紛亂撲窗騰空蛺蝶笑成雙天花偏散當軒塔  
銀漢遙鋪帶郭江煉藥清晨敲活火吟詩午夜剔殘缸

老狂心共爐灰死索和陽春興未降

成二鴻閣上邀龔孝積小飲紫煙在坐

廣文樓啓郡東偏小飲偏當欲雪天屋角暮喧爭樹雀  
城根波撼挂江船鍊師技癢樽前句老叟衰同画裏仙  
爲敘昔遊今隔世雙成莫笑盡華顛

於家菴亭子

僧廬不改故家名亭子新增宴息情津市煙橫連郭帶  
陂塘水闊映江明下方回望林巒隱上界平看遠近晴  
更喜一泓泉涌井通城爭汲此泉清

題画爲劉生初度

一道奔泉萬仞峰洞門隱處兩三松小橋過去蒼苔破  
知有劉郎采藥蹤

田間詩集卷第十六

田間詩集卷第十七

客隱集 辛亥

江上漫興

近岸峰將出癡雲一半遮沿郊誇麥秀展袖避楊花  
擲浪長魚立凝風燕子斜經旬愁對雨乍喜見春華

京口

東風狂徹夜乍息曉帆開艣急爭幫過江平剪渡來港  
淤官運阻灘落早潮回前路千檣阻客心空自催

過蘇州口號

尖頭艇子快爭先早見姑蘇塔影懸夜半幫開催棹發

天明婦起換郎眠軍妻船截平江鬧估客帆偷小港穿  
急雨好風停不得聞門回首隔昏煙

嘉禾曹秋岳齋中話舊

屢有過從約高談此夜深言于知己盡事託故人尋已  
信蒐求切寧存忌諱心當時曾載筆久向井中沉  
泯滅前朝事何由遍網羅追隨予亦暫聞見爾偏多失  
實應難辨成書許更過自慚無述作或可訂淆譌

重過南園感舊

名園零落委荒坡三十年來客恨多已分舊遊惟有夢  
却更新主許重過

頃典與蔣氏

門開別徑迷行跡樓鎖虛窗

憶嘯歌回首昔時凋喪盡情根不死奈予何

花欄石磴已全非滿地蓬蒿一徑微小院庭心常晒藥  
虛廊石角尚鈎衣王孫早見騎鯨去逋客爭憐化鶴歸  
偷得餘生羸底事羸將衰淚向人揮

亂餘興廢豈堪嗟人事爭更況物華檻外藤纏留死樹

池邊蔬圃替時花

舊繞池種花今皆菜畦矣

画橋址在思攜手綺閣

窗明舊住家

予合室避黨禍於此

今日短垣分內外相看咫尺是

天涯

一雨全傾薜荔牆人家分住讀書堂祇尋蔣詡新開徑  
莫覓陳登舊臥牀病裏爭長搖彩筆樽前限韻賭紅粧



田間詩集 卷一  
同時三子行吟地

併鑑在  
為三

石上溪邊總斷腸

家爾斐谿默卽事

園林三十載頭白客重來徑已隨山改門仍向水開衣  
冠留古意丘壑見詩才祇記吟安閣秋時臥幾回  
林塘終歲改聊遣暮年閒竟有千竿竹居然一帶山共  
驚松老大也覺水彎環別院鄰家典何時始贖還  
空闊臨池檻移樽納晚涼家僮能度曲小妓善飛觴孤  
月忽然上新荷分外香無心戒勝集爭怪老夫狂  
已無兒女累翻怪老來窮家爲林泉廢心矜布置工出  
門愁債主入室笑癡翁自合離城邑攜孥住此中

過子存城南別業

別業臨溪上輕舟觸暑過涼軒因老樹曲水散新荷且  
喜林花備無煩丘壑多此中饒布置看汝趣如何  
出城多画意一路樹陰連小港藏歌妓平橋過酒船煙  
炊深竹裏水踏綠桑邊早晚閒無事開門看種田  
頗覺溪流淺菱盤積漸遮古藤三伏蔭雜樹四時花地  
僻堪消暑時清擬住家酒盃通可廢閒話是生涯  
園林不厭遠宜署遠懷堂召客開高館藏嬌有曲房宦  
情知欲倦野興訝偏長正是偷閒日千秋業肯荒

客園酬龍門先生

鶴湖重到暗傷寬祇訪先生識故園山徑穿松新補石  
柴關繞竹別開門時移豈合辭家難僧梵惟應報佛恩  
聞道年來深避客獨蒙格外飯王孫

小構西軒一水環為貪隔岸看東山松林手植皆千尺  
池面新穿又幾灣頭白尚知龍性在耳聾益令道心閒  
自憐塵事無時了那得從翁此閉關

不到園林三十年當時丘壑已茫然數峰插水餘殘石  
雜樹成陰弄晚煙池上未慳春草句樽前空憶竹林賢

梅花小閣藏嬌處咏雪聽歌絕可憐昔與仲馭冒雪於此聽女史張秀度

曲今其閣猶在也

草滿庭階藥滿闌弟兄相對古衣冠靈光劫後存非偶  
碩果人間見亦難骨瘦漸知輕舉效眼方應得大還丹  
看君道氣饒清福正好溪邊把釣竿

無題

蔣亭彥朱子殷王天市柯寓匏曹掌公彝士諸子招飲屬予首唱贈徐較書月仙

百褶湘裙映綺筵藕花香處影娟娟風微客乞鬆羅帶  
日落人看過画船卮上口脂和酒送席邊心事倩眉傳  
白頭不作鴛鴦夢醉倚紅粧亦可憐

朋樽還似舊風流載妓聯吟憶昔遊醉把明燈揮白練  
醒驚殘月在青樓筆花買笑偏能燦酒量逢歡不自留  
怪煞徐孀年紀小前身曾共木蘭舟

席上贈趙素媛

媛自傷齒長見少年輒引避獨與老人周旋

為喜幽居郭外賒湘裙羞鬪石榴花可憐善病腰全減  
誰信多情髻總華把酒風流輸小妓昵人心性是良家  
知予久斷青樓夢約過閒窗自點茶

輓魏卜臣孝廉

去歲茲晨聚鄂城清江油幕故人情談諧每令愁顏改  
規勸時教盛氣平郭外宴遊貪蟹賤燈前博塞怪雞鳴  
如何我到君纔病幾日彌留送此生

庶常抱恨喪幽燕忠節箕裘幸汝傳早信孤臣應有後  
誰知才子竟無年門庭久重元方譽鄉里羣推小謝賢

五十日來相繼死教人何處問蒼天

阿季虎臣先卜臣死未兩月

寒菴相國忌日仲芳禮懺放下菴卽事感懷

城東精舍近舊是相公開竹暗林新護泉香脉遠來有

淵影堂僧洒埽佛院客徘徊三十年曾到那堪首重回

亂離骨肉盡腸斷向誰言我自遭家難公原報國恩千  
秋傷仲子二妙見曾孫慷慨當時意應無恨九原

別館潛踪日虛名黨禍時撥愁邀小妓雪涕咏新詩舟  
隘牀親讓宵寒酒共持平生知己誼一拜一銜悲

丈室安龕處當階散藕花像爭瞻福德衣已換袈裟君  
國且如此身家豈足嗟仲容遺事記談到日西斜

寄偃亭大師

得法宗門廿載餘十年前接數行書才名世外終難晦  
慧業生來豈盡除幸有逃禪吾道在不因作佛故人疎  
卽今領衆爭推出誰讓孤峰頂上居  
武林回憶舊游稀羨煞吾師早見機遯跡早聞爭賣藥  
出家何意竟披衣也知道力君偏定自愧初心我漸違  
苦趣暮年嘗欲遍此生未審得皈依

寄巖顥亭給諫

記得開樽共唱酬紅筵碧酒夕陽樓名爭壇坫疑前世  
分絕雲霄念舊遊朋好半爲方外客湖山還憶坐中秋

狂奴意氣今都盡祇剩蕭蕭白滿頭

與子睽違三十年清華爭羨一門仙早聞金馬歸梧掖

又見青驄出木天

謂長公方貽

最愛新詩從客借曾修短札

託僧傳衝炎擬買西泠棹底事揚州去未還

寄吳梅村宮詹

曾記陪京謁後塵驚看天上謫仙人清姿對雪遙相映  
彩筆當筵捷有神已向南廂悲舊吏誰憐東閣有殘賓  
當時末坐今頭白爭怪先生髮早新

秣陵煙樹已全空回首登臨似夢中祇課詩篇銷晚歲  
別填詞曲哭秋風同時被召情偏苦往事傷懷句每工

却憶清江楊伯起屢辭麻詔薦婁東  
婁水扁舟憶昔遊遙憐風物漢時秋  
山濤啓事真無故庾信哀時豈自由  
音樂解來翻引恨璽書徵後迴添愁  
淮王仙去遺雞犬佳句頻吟涕泗流  
聞道林泉足嘯歌近來酬唱興如何  
江東詞客才華盛嶺外逋臣忌諱多  
自把詩篇忘歲月欲趨壇坫阻風波  
如今亂定人俱老咫尺文園肯不過

懷曹子顧學士

武塘客到故人稀學士經年出未歸  
但有逢迎皆白首惟看子弟舊烏衣  
雲霄悵望音書少詩酒追從意興微

欲過南溪橋已撤短牆松竹隱林扉

画舫春遊載妓頻野田長是醉花茵  
紅牙按拍詞旋就

翠袖催詩酒未巡小謝風流餘令子

謂子開

仲文池館屬

他人

謂仲馭

同時觴咏今無幾那得經過不愴神

魏交讓遜同邵光伯沈止岳蔣亭  
彥孫巖儀令

叔子存弟州來暑集

彥會邀皆集天炎趁早過素交辭拱揖  
珍饌已駢羅丈室坐來闊回風醉後多看人  
恣飲噉偏慰老維摩晨星存老友大半聚  
茲筵解帶挂牆上開樽在佛前深憐羣從少  
所見一門賢已覺秋期近涼生薄暮天

自然忠孝裔庭戶見清貧學道寧辭腐持齋合認真  
楸枰銷日月藻句役心神却怪今都廢甘爲枯槁人

同爾斐過爾玉蔬圃巖燭置酒卽事感舊

每憶園亭好邀同小謝尋松聲前代韻梧葉暑天陰  
新月已微露殘蟬尚苦吟庭階幽意滿處處昔人心

庭隅扉半啓攬勝訝無窮小院迴廊隔幽軒曲徑通  
雜花皆等雨修竹迴含風一片山林趣居然第宅中

不辭疏鑿費歲月此消磨家世林泉癖門庭兄弟和  
清言酬客簡善氣接人多厥嗣還敦舊開樽候我過

梅里昔全盛今來已漸貧米常賙弟急園必逐年新  
門

戶勞猶子琴書付後人此中何所繫丘壑是精神

彷彿村三章呈子存

名園時命屐乍到客心猜何幸君新得還憐我再來  
石顏因岸補池小引溪開便乞千竿竹沿牆一帶栽

向南牆拓出纔不礙游觀漫侈規模大先教眼界寬  
軒楹應漸構林樹喜無殘我有扁舟興時來共把竿

爲園何必廣所喜近新居看僕朝除徑聽兒夜讀書  
來無妨雨過坐不厭更餘俗事知難謝緘關可漸疎

七夕同子存過谿默爾斐置酒令子巖燭詞客

張芸城女郎徐月仙在坐

扁舟逃暑至漫遣主人知妓慧留賓待

月仙借居別院留坐以待主人

廚荒載酒遲風貪巖岫好坐逐樹陰移日落樽頻徙荷

香處處隨

卽恐巖城閉其如良夜何清歌詞客妙

芸城善絃曲

戲謔老

翁多月細迷烏鵲星疎蹙翠蛾但存牛女意不用渡銀

河

子羹內人七夕五十初度索詩

吾家梅里子羹揮霍自喜恥問米鹽孺人蔣氏富貴相期羞從寒儉國變以後家賦式微人嗟杖杜孺人念庭階之不競陰求入夢之蘭知血氣之將衰空妒宜男之草雖閩權素重夫子矢無他心而門祚宜昌孺人實出本意遂許小星作伴果然明月投懷就濕推乾

母實忘非已出牽衣繞膝兒寧識是誰生譽溢門庭功存宗祀幸當七夕初度五旬樓上穿針無非續命之縷橋邊織錦盡作洗兒之衣合筭雙星已贏百歲銀河之渡豈遂無意於牽牛滄海之珠定知再胎於老蚌椒聊之衍可慶樛木之德難忘敬咏碩人之詩兼申王母之祝

見說家聲盛昔年老來益識內君賢每逢客至營珍饌

時把奩搜佐博錢萱草親培蠲嫉妒蘭芽代育倍嬌憐

卽今初度雙星夜百歲同心結宛然

喜孝起七夕納姬

謝家蘭玉舊盈庭且幸霜凋未盡零為選宜男蕃子姓  
更勞大婦訪娉婷黃姑河畔看新月烏鵲橋頭讓小星

草際螽斯偏應候夜深吟誦已堪聽

聞孝起內人甚賢

### 贈沈延年

城東高士宅終歲掩庭扉梅里幾人在松江何處歸  
體從爲客健室苦有田飢語及先臣恨吞聲淚滿衣  
溽暑頻過寺絺衣到卽寬神情工画靜風貌學仙寒  
故事勤相訪遺詩密與看知君餘意氣吾已老綸竿

### 潔園與仲芳閒坐偶成

每憶梅花墓連牆是潔園小橋分曲徑奇石踞當門  
山色重來古林陰別後繁餘年真樂事閉戶課諸孫  
亂去頻家難支持賴一身憂多容未老事定橐全貧  
木

榻研經叟松窗作画人知君無嗜好於此寄精神

經時不出戶苔色滿迴廊性自生來靜身於老去強  
嬌兒將入塾稚女又扶牀先世同彭祖偏疑得秘方

丘壑雖無幾所矜庭戶間祇愁新、可放老身閒時  
事難言隱家風未許慳南園期早贖應待長公還

### 哭仲馭墓

胥山南去墓門開長伴雙親慰夜臺二十七年留我在  
一千餘里哭君來淒涼忍聽傷心句點滴曾沾酌酒盃  
自念平生無負汝許多情緒向誰哀

吾兄高節已千秋老友重來痛不休門鎖臨溪空第宅



田間詩集 卷一  
徑荒負郭舊林丘遺書滿屋殘誰檢佳句隨身散未收  
最是九原幽恨事空餘雙淚洒松楸

新秋登慈雲寺千佛閣

武塘彌望盡平疇高閣憑闌指顧收殘暑已應辭薄暮  
驚飈陡覺入新秋千家樹簇孤城靜百道溪穿滿邑流  
最是下方憂早切雨壇鈴盞晚來愁

酬蔣亭彥

蔣詡蕭然三徑存客來踞榻漫呼門身經憂患名心淡  
家自窮愁友誼敦念我龍鍾謀致藥隨時鮭菜亦開樽  
莫將少日詩頻誦往事淒涼不可論

長孺招飲卽席二首

秋浦清風一水遙別離猶憶自前朝文章識汝飛騰早  
意氣嗟予老大消局罷吮毫閒作画酒闌按曲自吹簫  
阿翁絲竹初無興晚歲東山興頗饒

新安返棹早開樽高棟全消溽暑煩小妓令行人肯醉  
妖童曲奏席無喧錦囊徧攬黃山勝綵筆猶憐白首存  
自分老年狂不得酒酣仍許發狂言

與沈止岳話舊有作

故人門靜晝長關與客追歡興不慳俗事謝來鄉里重  
宦情倦後歲時閒應知博塞堪忘暑每聽詼諧輒破顏

年力未衰規避巧錦屏常怪夜深還

憶昔潛過寶月臺蒼梧纔得脫身來心驚虎穴離非遠

目斷羊城去未回予過端州值止岳往省過嶺屢傳烽燧逼登陴

應仗節牙才相逢拊手談遺事兩地艱危志總灰

初秋同子存訪西溪柯給諫霽園是日得雨

探幽河路涸曳艇問西溪水涸舟行甚澀屏啓山僮候廊迴小

豎迷芳渠流曲折石磴步高低且喜炎初解林間手可

攜

小橋隨意過忽已踰前岡石拒行來讓軒開覓去藏偃

松千歲短修竹萬竿涼坐覺商飈起林陰滿院香

匠心原擬画寓日總堪詩是樹皆凌壑無窗不面池曲

房聽雪夜虛閣對花時遙憶梧垣客閒宵有夢思

久識園林好今因老友過秋聲兼雜樹雨點碎新荷勢

曲無妨小峰奇轉覺多知君歸興切不奈主恩何

子存坐上以詩代書寄程周量職方

袁公舊識無雙士對客常稱曠世才周量為特丘首拔上每向予極稱其

才自變姓名離粵嶠早聞聲價冠燕臺詞壇嶺外先賢

盛風氣朝端數子開尚有遺民頭白盡可能同把論文

杯

海天風物已非初芒屨生還廿載餘南國嘯歌通似夢

西樵巖穴有誰居同鄉姻婭稱姚合謂六四海交親見

魏舒謂子存爭怪老狂不相識短篇聊代數行書

寄曹秋岳司農問素臣後事

當湖志士君宗彥謂素臣久客天南事已非亂日去留家

是累別來生死願都違十年消息憑誰問萬里妻孥仗

汝歸素臣死嶺外聞公挈其家還里自識門庭零落甚遺孤此外更何

依

寄蔣虎臣學士

聞君昔向越州遊把我詩篇咏不休同邑姚經三云與公在越東索觀予

詩謬加賞歎宦興但聽清楚冷奚囊偏是苦吟收木天宴坐

師黃面楚澤狂歌憶白頭衰朽也曾窺半偈前身彷彿  
是同流

飲子輔託園卽事

入秋猶酷熱邀趁早涼天載酒僮攜樂扶篙妓上船草  
間奇石臥竹裏小橋穿卽此蕭疎趣溪山轉自然

巖巒不恃石磊落見真山每到匠心處翻同無意間小  
軒因地構曲檻與池環頗怪經時鎖看君正好閒

四面通臨港編籬不作牆梧疎陰自密蓮謝葉偏香虛  
閣憑陵遠閒房委曲藏未須窮結構吾正取荒涼

日落蟬聲急高齋颯已秋苦吟悲鶴髮時曲試鴉頭背

燭調歌管分曹散博籌夜深歸路黑先遣郭門留

留別州來

客久難為別於君倍愴神弟兄頻死喪子姪盡孤貧衰  
疾嗟孀母賢勞仗一身莫言吾有叔自擬作閒人

州來言况

弟後事皆仗阿叔子存

贈王天市併念令兄肇域

孝廉閉戶罕逢迎言自先朝識姓名為敘世交懷舊侶  
每談往事憶難兄巨杯雅量轟無敵鄙句長吟記得清  
怪我暮年狂不減酒闌歌罷轉傷情

酬陳心微見贈原韻

半生漂泊髮成絲客路逢迎獨有詩陳氏道風前代著  
心微為幾亭先生孫謝家才藻後來奇廣陵煙月年年艷建業樓  
臺處處悲綵筆即今題咏遍教人重憶壯遊時

將發曹次典忽至

江城雨過客將回忽訝扁舟觸暑來鄂渚樓臺經歲別  
魏塘園館入秋開名心未歇精神富耳病初痊笑語精  
努力文場判皓首詩囊無復有新裁

毛穉賓沈延年周上衡肅陶招飲為晚湘乞詩

同人召客有蛾眉聲價還言待客詩心醉霞觴博玉腕  
菟消斗帳是冰肌領巾乞句先要謝團扇書情豈用知

見說趙家諸姊妹溫柔鄉定讓昭儀

倡樓昔遍武塘城一被標題早擅名小曲未調歌板按

新詩纔出舞筵傾誰憐騷客空存興轉覺仙班實有情

諸子皆學仙上界逍遙渾不礙儘教調戲許飛瓊

次日李赤茂招同姜西銘沈延年周上衡肅陶

再集晚仙復在

昨醉仙廚未解醒登筵又早見雙成樽前勸客情初熟

眾裏逢歡面轉生晚湘與坐客有舊詩句和多知暗喜酒盃病

起免教盈桃花結子源如故晚湘善生子難道劉郎記不清

坐客又有別遇嘲之

智證菴子存修供願雲大師茶話有作

精舍臨溪白舫通魏公修供晦山翁花闌早灌先秋露

白露前二日竹院爭承滿坐風酷熱是日大風因果誘人閒說鬼詩

篇入聖不談空多生慧業如何斷綺語從今且勿工

兩峰最好是清秋準擬相尋得再遊師已出山飛錫杖

我猶臥病滯扁舟道尊靈隱三千眾坐斷雲居四百州

黃鶴樓中詩削滅傳來猜著老堂頭

遙哭松江徐復菴

三吳遺老見全稀擬過松江願又違絕島暗聞徐福返

渡遼虛盼管寧歸艱難令弟窮途死惆悵孤鸞舊業非

我有拊棺無限淚，舍來宿草墓前揮。

別慈雲僧舍

我來方仲夏，忽已入秋初。不寐三更裏，孤際兩月餘。庭空貪老樹，扉啓映清渠。到日憐多病，高樓任獨居。

送客疲來往，尋常懶下樓。晝長粥鼓早，暑盛佛燈幽。得雨寬歸思，驚秋動旅愁。老僧情戀戀，臨去更扳留。

平生耽筆墨，況是寓荒林。眼益青燈暈，頭憑白雪侵。笛聲調佛曲，梵唱感人心。久住真難去，餘年倘再尋。

臨發家介子至自燕臺

經時歡聚爾，偏慳臨去欣。聞冒暑還，一路旱蝗連。楚塞

兼程鞍馬出，燕關書生姓。字爭驚坐京國，風塵宛在顏。細說北來行役苦，教人無興問西山。

酬陳雲銘見贈併憶尊先君子更

阿翁壇坫早知名，每憶高談一坐傾。濁世豈容清白吏，貧家無忝孝廉聲。門庭守舊嗟孤挺，笑語親人覺老成。贈我一篇多感遇，哀吟誰動故交情。

訪顧穀臣

魏塘高士老支離，見說人奇病亦奇。車轍到來多長者，郵筒展出盡新詩。交游四海文章伯，教授通鄉子弟師。一榻欲穿知坐久，端居還許客披帷。

留別魏孝儀志勉

武水棲遲兩月餘細看羣屐習全除承歡豈必下干祿  
繼志惟應苦讀書家政維新初尚儉交情是舊肯教疎  
尊公好士門庭廣且喜由君閉戶居

田間詩集卷第十七

田間詩集卷第十八

客隱集 壬子

將發坐北山樓對雨 是年再往武塘

北風舟不發小坐雨中樓老樹浮新綠懸崖走宿流琴  
移高壁挂書近紙窗收暫憩翻同客去留可自由 附舟東下  
一 閣迎山啓疎櫺對雨開遙憐一片石似爲此中堆古  
屋危巖下荒亭雜樹隈無窮丘壑趣待我客遊回

晚泊江口

覓舟纔得便已是暮春天汗漫悲衰老經營羨少年江  
帆看上水米價問來船客伴多攜酒相邀不使錢

大通遇風

一夜波濤撼朝來欲漸平正思安枕臥早聽逐幫行載  
重舟應穩檣欹客始驚榜人收港急回首特輕生

守風

已是春將暮淹留尚在茲登程嗔筭早冒險願寧遲載  
減行人喜吟成小豎知守風吾自慣所慮失前期

望板子磯

故壘濤聲壯凌江石勢橫奸臣初築此爲拒上流兵誤  
國潛逃竄謀身苦戰爭往來人指點遺臭汗磯名

錦衣洲

雨戀菜花盡餘香滿路熏田疇千頃接疆界一溝分客  
指橫江浪僮挑淺渚芹最憐京國改猶說錦衣軍

蕪湖換舟別同行客

北風不肯息十日滯江干舟附客同坐牀寬讓獨安攜  
來餅總罄分得米加餐一棹下京口無嗟行路難

望燕子磯有懷蒲菴禪師

已覺鍾山過遙瞻燕子磯拒波亭欲撼蹴浪石疑飛雜  
樹隱深寺高僧此息機幾年期一宿偏與客心違

望閶門雨不得泊有懷姜如農給諫

扁舟急櫓過閶門小巷深居望裏存開口衆中無可語



緘關鬧處不聞喧  
書窗近夜應收卷  
客坐何人共把樽  
誰識晚來江上伴  
孤篷獨對雨昏昏

到嘉興曹秋岳云毛燕山在郡走晤并晤真州

卞生

南還何處訪交親  
乍接曹摠說故人  
鬚髮看予疑僭長

燕山長 橐裝怪爾與同貧  
梧江共事銷磨盡  
庾嶺潛歸

死喪頻忽見真州門下客  
傷心兒女痛如新  
予在粵與真州王氏

結姻卞其中表也變後相失王氏舉家病歿予兒歸近遇盜死

曹顧菴招飲魏青城蔣亭彥朱子殷王天市錢

巖燭同集

西園才子金閨海內詞流舊壇坵  
故人一別三十年

鬚髯如雪重相見  
今日邀同老友過  
開軒秉燭成高宴

古苔延綠上階除  
新荷吹香滿庭院  
老友贏得兩三人

相看容鬢已全變  
信陵近婦興久無謂青蔣幹酒徒名

空檀謂亭憶昔同人盛燕遊  
妖童艷妓爭嬌眇  
坐密花

前肆舞筵粧成燭  
下開歌扇舉觴誰是李侯狂  
搖筆必

數江郎倩別去  
幾時成老蒼  
回思往事煩繾綣  
文場酒

量讓後生却怪朱家勇  
不倦謂子坐中王子與錢郎  
昔

誼今交吾皆善  
看君轟飲敵兩雄  
我曹衰晚生顏面  
才

華無復翠袖憐  
餽歡猶教少年羨  
我於身世憂病纏  
君

在宦途艱難徧卽今聚首似夢中幾番欲起情還戀此  
生高會復幾回飲罷還舟淚頻濺

谿默聞鶯同仲芳爾斐子存交讓作

玉霍軒開萬綠盈綠陰深處坐啼鶯溪邊雨過依然默  
檻外風來忽有聲小豎學歌聽欲澀衰翁倦寢夢還驚  
秋宵記得臨池酌脆管嬌喉一樣清去秋池上聽女  
郎詞客絃曲

同子存過吳子翼溪上居

魏家別業倚溪邊借與吳郎野趣偏子翼為子  
存妹夫城角樹  
遮微見塔門前港斷尚通船鶯花正好催遊屐蠶豆初  
肥佐客筵貧儉料無妨暮夜莫因疎豁更思遷吳有別  
遷之意

同子存交讓過沈氏北山草堂

魏塘西去假山頭其地以沈氏  
假山得名老屋臨溪直繫舟人掩

鹿門扉不啓客尋羊跡巷偏幽百年洞壑傳家古一郡  
衣冠載酒遊近日名園疎野勝到來猶見舊林丘

迴塘繞檻碧重重遙指平橋過短筇萬壑蕭條三夏草

兩朝耆舊九株松園丁肯借池亭坐俗客愁從洞口逢

值賈人載  
酒先至猶喜軒楹荒不盡古牆多是薜蘿封

涉園午日卽景

林塘雨細午餘晴桐葉榆陰滿院清酒後樗蒲籌早散  
門前賓客藝都精管絃按譜僮能合丘壑當軒閣已成

却訝今年衰老甚逢時減盡舊心情

龐文茲五十索詩

龐吳江人多子善談星

疎林遙帶鹿門扉家在吳江近不歸半世青毡淹驥足

一牀黃口困牛衣信心護法諸方恃知命談星妄想稀

我欲勸君重學易莫言往日未全非

龐自壽詩時翻知非公案

### 曉過南莊便訪倩雲

小港疎籬官路傍輕舟雙槳趁朝涼梅陰覆屋香侵幔

竹色迎軒綠滿牀老嫗喜留開閣坐兒家爭去隔溪藏

時驅妓之令甚嚴

為憐好客邀相見纔繫羅裙未曉粧

### 醉後贈倩雲

無端潘令撓花殘

一時青樓為令君驅盡

門掩高楊獨倚闌

姬姓楊頗

修長寶髻縮雲粧閣矮香塵拂地回裙寬袖拋紅豆偷誰

打齒濺青梅不怕酸最苦夜深翁背癢欲煩姑爪一搔

難姬爪秃嘲之

### 靈塔寺示我靜上人

靈塔寺邊來往頻每憐奇石臥溪濱回舟駐楫尋遺蹟

為吳仲圭兄園故址

入院開關見道人鬚喜同年依例白

上人亦以壬子

生

花矜鄰圃逐時新

導予看鄰舍雜花

小橋曲室安心處那得

從君結淨因

夏夜雨後月色甚佳同子存交讓池上

桐花香滿院月出一庭幽洗却林中暑賒來石上秋水  
光穿檻動樹影入廊浮坐久忘歸去塵勞此暫休

諸君既別月益皎然張濟甫傾釀小酌細談曲

理

良夜應難寐人歸月倍明老翁興不淺殘榼客同傾絃

曲分宮細源流入譜清

濟甫著有絃曲源流

向來翻樂府空費審

音情

馮研祥見贈筆書

蕭散江湖七十餘欲謀歸隱尚無廬家藏萬卷多零散  
膝有諸兒盡別居欵識辨知秦漢物臨摹看遍晉唐書

先朝法紙新裁扇爲寫河南帖贈予

遊雲間夜渡泖宿長水塔同子存亭彥作

奇雲向夕起出港意徜徉孤塔餘毫末扁舟入混茫境  
虛邀月早波動引星長極目知何際凭軒酒一觴

小艇當階繫開樽風滿樓水光三泖接燈影一欄浮牛

女情先渡

七夕前一夜

魚龍氣早秋所思遲不見煙樹隔中

流

遲田髯淵不至

贈張洮侯

隘巷經秋草弗除往來爭識子雲居婦賢慣出牀頭酒  
客到頻移榻上書但是把盃先自醉長因罵坐與人疎

問年我亦同壬子蕭散風流漸不如

訪家子壁

往事心傷不可論先朝壇坫幾人存湖山劫後重尋址  
軍馬城中獨閉門生計祇聞新藥室家聲同說舊王孫  
雲龍意氣當時合白首相看兩弟兄

長歌贈董蒼水

昔我落鳧遊雲間雲間鉅公爭往還考功時事論侃侃  
孝廉史學胸斑斑謂瑗公其餘詩篇稱妙麗黃門獨步  
無人攀可憐國破三君死文采風流長已矣著書多諱  
世罕傳後起才名誰得似三十年來見董生笑談慷慨

心爲傾逸思恍惚風雨集真氣淋漓鬼神驚已覺泖水

空明現頓使機山宿霧清吾家舍人亦作者

謂葆舍思

吐韻追風雅縱筆不患才華多選言未覺篇什寡甫與

白也趣各殊苦心逸氣爭相下董生矢志家日貧年年

出作江湖人百粵瘴深題咏遍三湘煙闊棹歌頻如此

窮愁寧足惜天留我輩爲詞伯陳言綺習盡埽除雲間

壇坫重開闢

家葆翻以金門稿見示覽畢有作

吾家武肅後子姓東南蕃才華世不乏家聲自昔尊舍  
人起雲間昂驥金馬門惟昔先司寇名德久弗讓君生

秉夙慧再來承佛恩探懷得智珠下筆傾詞源既窮作  
者奧直破前輩藩雲間昔才藪壇坫冠中原選音絕鄙  
細摘藻何翩翩豈貴質偏勝抑恐文過繁近得舍人出  
毅然去陳言其情非不至其詞迺極溫方響玉則和比  
質金以渾庶幾風人遺猶見雅道存同時有董生謂蒼水  
逸氣浩若奔往往任天趣落落欲孤騫君詩必頓挫當  
放時忽吞澄也一老狂嘯歌江上村作詩聲苦悲語出  
雜啼痕自知多忌諱聊以攄煩冤深荷舍人誼行葦藹  
然敦亦有舊詞伯謂子璧同是前王孫哀我爲窮士視我  
爲諸昆雖非連理枝共此瓊樹根我如涸轍鮒君如天

池鯤雲泥各有分安得相攀援所欣臭味合獲把論文  
樽我才枯落盡志探音韻元大旨窺羲畫微言寄漆園  
何時棄篇章與君共討論

倩扶以今年春月過武水旣去予始來秋後再  
至連飲數日醉後走筆贈之

花時不晤漫踟躕又值蘭舟向鶴湖墟畔醉眠容阮藉  
陌頭來往看羅敷酒闌趁月慙尤倩病後臨風怯待扶  
莫笑相如頭已白琴心老去未全無

雙蛾寫就遠山分玉腕添香卷幔焚奩側點毫題画扇  
花間登閣濕紅裙追歡我自尋風月適興誰來夢雨雲

日開詩集

卷十八

羨煞麻姑纖爪好指爪最長夜深背癢肯勞君

念佛珠齊縮背斜搗彈偏要隔窗紗藍橋路側迷仙窟

姬住西涇橋昨到雲間覓不得

白舫煙中是妾家角枕暗聞芳杜氣膽

餅新換海棠花自憐曼倩詠諧老猶戲班頭萼綠華

子存病瘡久不到園詩以問之

咫尺園林久未來楸枰竹榻暗生苔耽吟恐攪三更夢  
已瘡應須七發才幾日欄邊梧子大今晨閣外藕花開  
知若病起塵勞息肯負新秋酒一杯

和子存以飲光右腕作楚二絕見慰之作

曾經磨盾據鞍來老去筋攣展不開莫是腕中真有鬼

揮毫把盞亦相猜

半生挾策天涯走周易南華長在手莫笑談經揮塵難  
猶堪把臂入林否

寄汪徵五漢上僑寓

憶昨寒江欲解維扁舟日落叩門遲銷魂正值霜天暮  
惜別偏傷老大時郭外樓臺秋置酒亭前賓客晝圍碁  
尋思已是三年事久負晴川唱和詩

與史趾祥別二十八年矣臨發武水趾祥忽至

悲喜之餘遽爾分手短述言懷

揮手三衢廿載餘白門纔附數行書如何旅舍驚逢日

又值遊踪欲去初，述汝靜功應有得。疑予豪氣未全除，同時兄弟今誰在。已似晨星可更疎。

吳門晤姜如須令嗣奉世有感

在昔同流寓姜家，兄弟賢交深鉤黨。日客散過江年梅，福名難變梁鴻噫。不傳淒涼逢令子，話舊淚潛然。山東才輩起視汝，定何如遠害詩篇少。逃名故舊疎楚狂，空有泣越絕。竟無書不是難兄語，卿野席上細言往事遺孤豈

識予

吳門遇魏凝叔

古人不可見，交道日以衰。我生踰六十，幾人真相知。竊

聞易堂風高義，我所師。子栖冠石巔，我居樅江湄。相去三千里，不見遙相思。中有二曾子，亂日常追隨。躬菴未識面，曾一叩茅茨。確齋與和公，扁舟江口維。訪我不得遇，留詩情見詞。從此十餘年，跡若東西馳。但接青原訊，爭索田間詩。我詩不足好，所好其聲悲。閭門訪子寓，覲面還猜疑。上階道名姓，再拜涕交頤。思君三十年，此見一何遲。我老遭多難，顛顛鬢如絲。君年纔五十，猶見盛壯姿。雖無膝下物，同氣足自怡。大兄客幕府，小弟歷邊陲。諸侯爭召致，去就爲安危。況復書等身，其言悉已垂。大雅久不作，斯文當在茲。吳人好訾訶，今者交口推。乞



言屢滿戶願子無濫施常恐多假借翻爲忌者譏我行  
將北去思救合門飢平生諸制作欲行今非時易學吾  
親授吾老微有窺書成亦不出序者非子誰勸子還山  
中明秋早見貽

八月十八日同周翁仲榮登君山回至永定壩

觀潮和韻

扶筇爲有觀潮約絕巘偏驚二老來平地湧將銀作屋  
晴空噴出雪成堆那知盛怒尤爭鬪怪得遊人不上臺  
足力小疲聊茗飲隔窗已報轉頭回

寓王而出溪上居

縣門南去小橋頭隘巷斜通水竹幽塔火長看高下點  
江潮不住往來流丹楓色照孤城晚白豆花稀滿架秋  
最是主人能好客時邀擘蟹試新筍

君山歌爲龔雲石明府初度時將北去詩以言

懷

延陵九月秋光濃三十三朶青芙蓉君山獨起當北障  
此山應數第一峰君山之陰江流急其陽穰穰萬家邑  
民安兵戢吏彈琴雞犬羊駝自出入朝來佳氣滿城闔  
爭祝令君初度辰把菊甫過重九節重九後五日登堂早近  
小陽春立冬前三日祝君誰是君老友老友相看皆白首幸

舍曾經累月留臨觴那更先分手舉觴直上君山頭山  
外遙將季子疇春申珠履久寂莫惟君縞紵情千秋

重九日過趙翔九家晚登永定禪院樓

城北蕭條處士家衡門臨市短牆遮遶籬碎菊多無種  
上架秋藤細作花出郭尋山常費酒爲僧邀客自賠茶  
憑樓聊應登高節坐看潮來待日斜

同山右史非常毘陵毛司伯登君山懷朗伯靖

江

官閣憑陵興不孤雙眸凝處轉模糊波心淼淼帆欹側  
煙際茫茫塔有無歷徧雲山寧似晉望窮沙嶼總爲吳

黃郎只在孤城裏絕頂乘風或可呼

小酌臨江暮色催客懷且得暫時開交遊祇覺南中廣  
豪氣終從北地來黑樹影邊城郭在白頭浪裏渡船回  
漫言老去登臨倦此是追攀第二回

與江陰諸子言別再集君山朱玉汝要予首倡

秋盡君山兩度遊臨行又上最高頭一天雲氣含風怒  
萬里江聲趁夕流牛犢自耕沙面地漁檣閒駐浪中舟  
酒餘客起聯吟興莫作驪歌動旅愁

京口舟次寄劉臣向

秋盡東遊客未回思君獨上射蛟臺尋僧隔嶺聽經去

田間詩集 卷一  
挈伴誰家看菊來  
童穉好於閒處教小兒望時  
歸帆多在望中猜  
計時花甲過期久  
悵望江天一把盃

### 揚州

水落邗溝夜泊船  
一般風物客淒然  
關門仍舊千櫓塞  
市井重新百貨填  
商賈不離爭利地  
兒童誰識破城年  
當時百萬人同盡  
博得孤忠史相傳  
竹西歌吹舊繁華  
惆悵關前問狹邪  
一自風塵齊上馬  
至今煙月亂啼鴉  
長亭祇折新栽柳  
官閣難尋舊看花  
夜聽隔牆絃管急  
聲聲哀怨雜邊笳

### 訪汪辰初不遇

萬里天南客生還  
望已休阿咸逢夏口  
說汝到揚州漢

遇汪徵五苦自言難盡悲  
無淚可流如何停棹訪  
又作

### 楚江游

僕隸無人在叩門  
識我誰一心依故舊  
盡室出艱危見汝佳兒喜  
增予愛子悲向來同事  
誼應有細君知

### 北行途中雜紀口號

見說黃河過長途  
有定程四更呼火起  
十里聽雞鳴樹影遙  
村合湖光夾路明  
所經多廢址還指舊時名  
下店無人色方冬  
行路難望南風亦暖  
向北午先寒馬櫪連  
牆臥輿僮共坐餐最愁  
塵蔽日前去正漫漫

關街遮客住叱馭尚爭前立馬論常例停燈數現錢忍  
飢衝霧去果腹見星眠盡是戕生法那堪更暮年

入冬天氣短又是日斜時水淺車行熟沙深馬去遲人  
情柔亦得客計老方知同路常忘荅多因暗咏詩

信是今年稔誅茅滿道旁路平車碾破冰滑蹊隄防買  
飯欺南客留人說上房望中陽氣混錯認是湖光

水迴合圍人  
謂是陽氣

遠望  
如大

客夥隨幫走驢行讓馬前鞞鷹橫路掣箭鞞近人懸口  
噤難呼伴指僵自墜鞭軍裝皆可畏誰去辨愚賢

日出月無色風嚴冰不開逢人驚項領泰安人  
頸多癩笑客浣

塵埃路確輪蹄苦峰青山嶽來圍兒偏解事遙辨是徂

徠

望嶽催驢過遙憐老眼昏懸崖通客路絕頂見天門千

嶂側看現數峰回首尊平生登覽興行旅向誰論過泰  
山下

欲停一日游  
覽同行不可

已覺出門晏荒蕪正點更麥田思雪壓方望  
雨雪遊子喜天

晴人面判霜割馬頭看月明殘星猶在眼早見德州城

掌燈催客起參井正當頭冰結鬚妨斷風酸涕不收危

樓爭列雉小院亦深溝塔級層層見遙知是景州

一路人煙密生涯是果園乍驚泥蓋屋漸有樹成村賣

餅三家市懸鐘五里墩驟車衝突過應已近都門

道上口占贈同行清漳李生

行旅蕭條客路悲孤心相仗互追隨霜嚴雞喚登程早  
日落驢疲下店遲撲面塵迷貪話舊低頭山過爲吟詩  
看君萬里輕來往辛苦難堪老大時

又和李生韻一首

閩海生還臥故林半生憔悴到如今雲山不斷南遊夢  
霜雪難明北去心一路車塵誰是伴經旬驢背獨成吟  
同遊賴有漳南客贈我詩篇感慨深

初至都門口號

汗漫來燕市何門刺可投要能容放蕩還是舊交遊側  
身爭巷口轉面避風頭不用騎驢出徒行得自由

寓增壽寺

一路風塵滿鬢華解鞍投宿老僧家房留官坐監施飯  
店與人開帶賣茶庭樹午餘時繫馬鐘樓日落亂栖鴉  
五更不睡驟車過鐸響輪聲枕畔譁

酬嚴顯亭回卿

疾風吹塵沙白晝晦庭院故人在高車乍接平生面執  
手慰艱難再拜申縉綬一別三十年疑是夢中見喜我  
神猶王怪我髮全變我生患難嬰欲語淚先濺如何青

雲客不棄泥塗賤庭樹莽蕭蕭頓覺和風扇問我所著  
書新詩復幾卷探編得周易開覽大稱善子夜集嘉賓  
炳燭成高宴指我杵臼交誇向坐客徧述我詩句豪還  
及當壚倩風流宛似昨歲月逝如電可憐同遊子盡是  
東南彥天地一翻覆回首舊壇坵死者長已矣生者異  
鄉縣往事話淒涼夜深語不倦嗟我萬死餘生意纔如  
綫區區未死心寄託在筆硯古道久不作故交復誰戀  
君今在高位吹噓勢以便倘令製作垂豈必溝壑援所  
貴經學傳肯但詩名擅

贈陳胤倩

人生相知心不在會面久古人稱故交卽在傾蓋後況  
我與子誼昔忝令兄友令兄早擅場忿起同舍陡失意  
一言起囂然被衆口避跡入雲間是非向誰剖毅哉陸  
太學謂子抗言義不苟送之遊帝京旋縮開封綬南渡  
擢御史上書請迎后九重殊內慚自知非匹偶遂遣緹  
騎收御史加鎖紐檻車過吳門太學維舟守我方羅黨  
禍變姓草間走招手語逢窗雪涕送林藪那知國家壞  
賢者厄陽九終殉江東節不死奸臣手舍人早潔身謂  
庭千秋同不朽不知地下逢相視一笑否可憐陸太學  
垂老自貽咎遠放無歸期南望空搔首嗚呼三十年天

地一塵垢生死理以齊恩怨復何有是時子年少名已  
出兄右方生謂爾前入都定交在杵臼相和易水歌共  
飲燕市酒豈知昔時人未死猶有某今我策蹇來所挾  
但敝帚子客回卿衙僧舍門同叩開門下車揖相見皆  
白叟吾子誼極真回卿情亦厚縱我舊狂歌不自知老  
醜忽憶捐軀人默然發深忸我學在圖書授人人不受  
篇幅一尺盈心血十年嘔倘能使流傳吾生庶無負

訪龔芝麓宗伯

百年禮樂存宗伯四海交游在合肥俸祿可憐隨客盡  
詩篇多是對人揮物情輻輳寧能謝主眷頻繁不放歸  
自昔老狂蹤跡遠於今始得一握衣

十月風巖客路賒疲驢破帽走京華行囊頗重無非橐  
老筆將枯或有花頭白未能忘嘯咏身危不敢戀煙霞  
詞林壇坫君今主宗匠推誰第一家

文采風流世所師精神也爲應酬疲朝回不斷樽前客  
病起還添枕上詩妙句豈緣思索得高朋真與性情宜  
可知心事牢騷甚寄興攄懷總在茲

春遊高會雨花臺坐客全收江左才偶值野人間策杖  
特虛片席與銜盃門庭廣大原無外生性疎狂每自猜  
老去益聞交道古薦紳叢裏爲君來

贈姚龍懷少司空

物望重秋卿經時憲府名紀綱惟鎮靜諫議早持平夢  
裏朝廷事閒中故舊情萬方益覆久何計照蒼生  
行年踰五十鬚髮已全新科目推前輩班行式老臣得  
君心益慎任事久偏真點筆精詳處生全多少人  
奉職平生恪明刑此日難讞詞無一實弼教豈全寬盜  
諱幾時息民冤何處歎賴君清徹底先使故鄉安  
論年慚老友接武見佳兒世德常存厚家傳不好奇異  
書從小讀新句少人窺念我飄蓬老狂歌正可悲

訪王敬哉宗伯

懶性平生畏曳裾故人惟見老尚書追隨祇憶風波裏  
涕淚重思患難初分隔雲泥勞齒挂交存杵臼怪音疎  
漫驚鬚鬢今都變酒興詩懷總不如

天門咫尺乞身歸米市南頭訪舊扉客到大都仍皂帽  
人傳小巷是烏衣詩篇閉戶堪娛老相業貽家且息機  
坐看司空調鼎鼐手成元化慰庭闈

亂離烽火遍三吳聚首江天興未孤我竟舉家沉震澤  
君還結伴出汾湖路分南北情難寄跡判行藏道不殊  
一別到今三十載相逢依舊老狂奴

每憶江村繫棹時生還有路勸相隨篷窗挽袂情何切



津市逢兵悔已遲，促膝遍詢同難客。開箱急檢寄懷詩，心傷往事難爲說。此意旁人那得知。

酬紀伯紫見過

平生蹤跡白門久，白門名士皆好友。吾兄落落罕深言，著作常推第一手。昔時住近周處臺，門掩三徑長不開。祝君初度叩門出，至今負我春酒盃。如此才情竟蕭索，老去祇爲諸侯客。終年筆札遠依人，頭白纔逢大宗伯。宗伯詞壇第一人，與君筆墨交有神。丈夫得爲知己用，何必寵譽出其身。我老策蹇到都下，都下故人知者寡。相逢執手爲躊躇，傷予多難淚盈把。旅舍蕭條頓有春

也知不語意氣真，看君落穆情如此。愧煞輸心慷慨人。

宿家亦友塾齋偶成

齒序肩隨四十年，餘年重聚客途邊。風霜荏苒千莖雪，燈火淒涼萬里氊。飯熟行廚常共噉，酒闌大被亦同眠。漫嗟老去皆貧賤，回首垂髫盡可憐。

予初與亦友方壺訂交於吳子遠齋

過張夢敦太史寓齋有作

吾鄉張太史，端不愧詞林。功課朝回補，詩篇客去吟。好書抄出讀，愛帖借來臨。暇日思研易，相期共討尋。入門寒色滿，稍喜一窗明。心法圖中悟，文章馬上成正襟。窺性學隔幔，聽書聲自課。佳兒讀常聞，到五更。

田間詩集 卷十八  
應酬徒步苦來往叩門頻瘦馬騎能穩僮童見卽親論  
心惟矢慎礪俗獨安貧物色矜雙眼塵中早識人

與房興公庫部初不相識遇白仲調坐間一見  
傾倒言手抄拙集日置案頭因抵掌劇談頗  
爲白君所訝

平生友誼數關中揖罷相看臭味同好把酒盃談漢事  
每吟詩律喜秦風篇章繆辱編蒲寫姓氏何勞刺字通  
坐客自矜朝士貴論文且讓野人雄

贈白仲調

鍾山昔日大社開方生同我騎馬來

謂密

毘廬閣下文

思苦袒衣搗鼓轟如雷須臾諸子篇章出就中數君兄  
弟才甲申以來國事變誰人復問舊壇坵南渡奸臣黨  
禍興一時名士株求徧周雷竟死可如何君亦相從陷

網羅

二白因省師周仲馭獄  
中邏知之幾不得出

我變姓名逃吳市可憐盡

室沉江波脫身遠作天隅客鄉國十年烽火隔鍾山老  
友半逃名文壇虎視稱二白二白遭逢意氣新仲子滿  
腹皆精神當時閣下才相許果作南宮第二人怪君年  
老博高第一官守選還需次只今羈旅滯都門天寒歲  
晚無歸計語君勿復歎窮愁亦勿爲予嗟白頭回首昔  
年同難客幾人猶在世間遊

酬徐白峰贈画

徐生書画古人儔吳下今推第一流蕭寺屐殘燕市凍  
江城門鎖魏塘秋舊秋在武水風塵不變煙霞色冰雪  
惟增筆硯愁一幅單條勞寫贈持歸長挂北山樓

贈余佺廬大行

楚國人倫望燕臺好士聲眉間瞻爽氣言外見深情道  
以論文合交於握手成老年逢快友真足慰平生  
相知何必舊傾蓋似君稀祇是聰明大都忘狂瞽非往  
還惟任意應接渾無機有仲思談易期予數叩扉  
風沙燕市滿下慢小窗幽鄴架閒思借郇廚每自留開

善  
門由客到叱馭為人謀遙憶魏無忌荆南何處舟君與子存

數過余鴻期斗室有作

帝城客到苦奔競看爾閒如寄院僧車馬喧中長抱膝  
笙歌沸處獨挑燈為耽煮茗爐存火暫輟抄書硯有冰  
我欲縱談無聽者短鞵踏凍興時乘

酬陳是菴院判

雄才散地願多違長巷深居晝掩扉院裏事稀時一到  
橐中金盡尚思揮入門客慣呼牀坐返寺途遙借馬歸  
祿米舉家爭待哺又分遊子慰朝飢

雪中謝陳中美贈炭

一夜燕山白僧窗不敢開  
正愁年下炭剛喜雪中來  
樽煖凍餘瀝爐然死後灰  
知君趨幕急爲此故遲回  
便好閉門坐無嗟天不晴  
耐寒遊子事煖老故人情  
夜榻眠初熟朝炊飯早成  
客中還念客高誼見平生

日者楊公采索句送何崑復之建寧別駕  
建寧地據閩中勝別駕才騰輦下聲官職未妨棊酒興  
溪山真慰嘯歌情民因吏虐常逋賦田被藩收久廢耕  
此去釐清功不小前程無俟問君平

飲佺廬寓以夜禁促回不俟曲終途中悵然

一曲清歌判犯夜應門何事苦相催  
出街依舊多燈火空使狂奴寂寞回

嚴方貽侍御見招卽席

禹杭清白舊家聲臺諫爭傳父子名  
殿上抗顏諸大老樽前執禮老狂生  
冰霜夜肅官街靜風月閒談憲府清  
時事望君陳讜議許多聞見恨難平

壇坵當年無我輩雲霄老友見尊公  
傳家世羨池爲鳳避道人稱馬是驄  
吏弊定須持斧出民冤那得叩閭通  
卽今盜賊紛紛諱可許風聞達上聰

同伯紫亦友坐宗伯榻前見梅率成

侵寒力疾上衙回小閣蕭然道士陪導引有功權謝藥  
交親閒話罷銜盃已聞環珮聲初遠莫遣詩篇興早催  
笑指梅花偏耐冷看他冷後向春開

田間詩集卷第十八

交甫宮商歸風民間楚歌

空對孤燈

一山清絕

田間詩集卷第十九

客隱集

起壬子冬止癸丑

梁大司農玉立招飲有作

計相邀賓閣早開論文同把夜深盃相逢南國交情滿  
坐上皆  
吳人  
乍對西山爽氣來燕市自知難作客漢廷何意  
獨憐才白頭皂帽渾無賴酒後狂談迴不猜

刺字懷中肯漫投廿年江國仰風流日邊兄弟三珠樹  
天半文章五鳳樓百草上階爭應接孤雲過幔亦扳留  
聽君咳唾皆鍾呂瓦缶如何可唱酬

大部吳門久播傳雞林聲價冠羣賢滹沱霧淨樓臺迴

鉅鹿秋高壁壘堅感興自多懷古調斷腸難誦悼亡篇  
尋常屬和揮毫得却到雷門氣索然

竹根盃換夜巖初世法逢迎許盡除異代尚悲鉤黨禍  
同年曾接孝廉書謂家仲芳也知大老門原廣卽恐山人禮  
太疎好笑故交無尺素憑將三寸作雙魚

程周量職方席上作

廣南才子程職方高風爽氣莫可當書向樞曹修政事  
夜尋詞客論文章詞客紛紛遍燕市職方客盡天下士  
上坐何來皂帽翁銜盃重話嶺外事嶺外風物近如何  
曾是狂生舊嘯歌遊仙夢裏虛名大劫火灰前勝事多

勝事虛名何處說嘯歌回首情猶熱公安老髯好篇章

謂袁特丘每歎程子才奇絕記得偷閒南海來詩朋酒伴盡

追陪被酒夜眠光孝寺題詩朝上尉佗臺詩成落筆人

傳遍花田香浦爭遊讌陳生

謂喬生

落落鄙生癡

謂湛若幾

度問君君不見朔風一夜海水飛報道羊城已被圍端  
水弟兄同日散蒼梧狼狽隻身歸兵戈阻絕孤城遠幾  
人能向刀鋒免天留程子活草間一上南宮遂冠冕江  
村遠至老髯書問渠眼力今何如惜哉此翁晚節墮憐  
才藻鑑良不虛萬事茫茫復何有二十餘年空白首曾  
從武水寄相思還到金臺飲君酒酒酣慷慨說當時說

向旁人那得知可憐兵後書焚盡猶記狂生兩句詩

周伯衡兵憲見訪論詩互有吟誦即成長句奉

酬

片席塵凝啓幔遲先生繫馬已多時談深索筆親裁稿  
調合移牀互誦詩句到鍊成纔淺易情惟真極始新奇  
紛紛詞客矜風格此意如今說向誰

慚謝南州榻早虛

曾過南州蒙見訪已去廬山

芒鞋原只上匡廬閣

門不袖狂生刺都市先勞長者車握手細將音句審忘  
形遽覺送迎疎如君風味今人少禮法應為我輩除

八十老僧巢公小像索詩

應周兵憲伯衡魏環溪侍御之命

頭白都門老戒僧心休不厭市囂陵一肩放下千峰柱  
雙膝長趺半夜燈罵世也聞喚尚在護身惟有律堪憑  
平生操履思傳後要乞文章最上乘

報國寺古松歌

報國寺中松幾株盤拏鬱曲天下無松下何年遂成市  
市氣日盛松以枯松惟耐寒不耐熱榮枯一任誰分別  
榮者謾謾餘清風枯者落落存高節殿前

延壽殿

兩樹最

稱奇枝枝倒挂橫階垂根柯左右皆反紐似欲奔赴相  
撐持闌柅重重遮得否一枝不顧墮地走兩樹獨留一  
樹陰此下應有神物守我來樹下喜且悲偃蹇空矜霜

雪姿毘陵毛生亦好事市塵囂處還題碑毛生腕力大  
於虎看松如看公孫舞振筆一揮字尺餘欲與此松同  
千古

菊隱詩爲膠城陸翼王賦

我昔膠城遊風物何清美秀色燦幽芳

膠城多名花

正氣鍾

高士遂有黃先生邁世而獨起吾子學易人親承先生  
指邇近燕市中悠然見素履所學必稱師發言皆妙理  
先生昔殉節回也未敢死辛苦搜遺文艱難撫孤子雅  
志悉已成古道今在此陶菴旣千秋菊隱意有以菊  
不在花隱亦不離市祇此傲霜姿澹而靜者

疎放對君肅以止平生好圖象子必探奧旨安得三徑  
資同住紫系里得酒互斟酌研經窮大始有時疑義析  
酣醉芳叢 耳呼陶菴爾知亦歡喜

龔伯通四十

春風初到帝城邊御柳官梅次第妍獻歲椒花猶滿把  
元宵燈燭已爭然共稱伯也懸弧日剛是尊公射策年  
富貴卽從胎裏出聰明真自性靈傳家由科目情難已  
身有官資任且懸堂上德星方瑞世階前玉笋又參天  
人言齒正當強仕我羨聲能繼大賢更喜老親聞道後  
精神徹夜伴賓筵



徐原一太史招飲

宣武門西太史廬北窗閒啓映清渠梨花照夜當軒白  
柳色粧春隔岸舒都下有才皆入坐榻前無架不堆書  
風流近數龔宗伯除却崑山外孰如

癸丑上元登白塔寺

寺傳遼后舊粧臺爲放游觀趁伴來南苑冰澌流漸漫  
西山雪盡翠新堆紅樓下見端門近紫禁平臨金殿開  
舉目故宮渾未改傷心一倍黍離哀

煤山

玄武門通一水環君王遺恨滿煤山廷爭未必南遷謬

駕出猶聞夜阻還滄海日沉長此暗青天龍去有誰攀  
卽今御苑傷心地草漬啼鵲舊血斑

正月燈夕後爲梁司農催妝

熏天花燭映三台北斗斜傾此夜盃五色雲扶雙璧合  
七香車擁六珈來梅思點額侵寒綻柳欲分眉及早開  
莫倚尚書官職大粧成不出待詩催

梁家画閣帝城傍隔幔瓊簫引鳳凰劉擘續緣仍趙女  
晉侯虛室待齊姜珠求合浦新偏媚花采連枝晚更芳  
遙聽履聲知得意六宮爭賜與添粧

雨中同方虎亦友陪龔宗伯過圓覺寺

久約看山期屢更  
恰逢朝雨出春城  
千林霧合遮門遠  
一路溪奔趁馬行  
樹杪凭樓雙闕迴  
雲中捲幔萬峰平  
尚書病起登臨倦  
小坐聊存物外情

都門雜咏

黑窑燈市早春開  
閒看游人擁巷來  
惟有關東多買主  
家家載得滿車回

燈市

古寺松根百貨居  
珍奇滿目價全虛  
詞林無事逢期到  
冷眼閒看指舊書

廟市

孤松野外恣盤桓  
屈幹迴枝繞院寒  
却笑慈恩寺裏樹  
根株枯死尚爭看

刺梅園松

昨夜西風雨乍收  
黑龍潭上看新秋  
尚書賓客樽前滿  
一半詞人是白頭

黑龍潭

酬王山長廣文

長沙才子氣如雲  
垂老雄姿尚出羣  
學舍半瓊聊借坐  
詞壇一席許誰分  
飢來倔彊陶元亮  
酒後淒涼鄭廣文  
不是遇君偏好辯  
辯才那得更如君

予每遇山長輒與折辯竟席

巖顥亭席上遇朱全古

鬚髯相逢認不真  
巖公席上半遺民  
巨觥角量疑前世  
時輩聞名似古人  
往事淒涼南國夢  
何年流落薊門塵  
衰窮賴得傳書種  
早賣文章養老親

全古得子最晚今有聲都下能以筆

墨養親

王敬哉宗伯邀同諸子集豐臺別業看芍藥印  
事

十里豐臺路前朝萬柳園出城晴景好夾道樹陰繁白  
屋栽花業青郊放水村尚書期客早載酒候籬門  
鞍馬林間簇看花客早來蒼苔三徑破紅藥萬枝開照  
席霞同燦鋪階錦漫裁最憐初放好不用煖風催  
爛熳百花叢相攜半老翁色欺霜鬢白夢倚曉粧紅歲  
月交遊重雲泥臭味同開年無酒興今日醉春風  
小構殊疎豁憑軒朶朶浮可憐滄海客重伴子房遊多

病詩全減追歡量不留坐中無俗士一酬一篇酬公曾飲我  
坐在俗客索詩不得一字

陪龔宗伯飲王氏園卽事寓懷

尚書病起狎春風約伴看春興許同絲竹偶然隨謝傅  
樓臺何必屬萊公樹陰祇借鄰園綠歌袖遙憐隔幔紅  
却憶江南花正好花時忙煞老詩翁

送何信周下第

帝城桃李競芳菲獨指千山叱蹇歸分手正逢修禊事  
以上已  
日別 到家應及換生衣青春怪爾經時過白髮嗟予  
後會稀計日阿翁花甲近強收和淚慰庭闈

燕江鄭元彥孝廉蘭谷山房索題

孝廉茅屋傍溪開，谷口還饒入世才。  
閒怪白雲穿幔去，遠邀流水遶門迴。  
千峰月向松間出，三徑人從竹裏來。  
獨有一窗分老友，夜深讀罷共銜盃。

燕臺送別稽田還里

薊門秋到暑初殘，蕭寺松聲送客寒。  
亡命互憐雙鬢在，破巢敢望一枝安。  
衰年故舊分攜苦，晚歲行藏自信難。  
我有長歌歌不得，恐題往事重悲酸。

送何別駕次公之皖

長江萬里此咽喉，吳楚分疆第一州。  
峰色晴開天柱曉，

濤聲夜送海門秋。隨班坐候趨衙鼓，出郭看收下網鈎。

君過樅陽勞借問，射蛟臺畔北山樓。

小樓名

送羅弘載入皖幕

江城府署最蕭疎，風物遙憐入幕初。  
村店家家酤白酒，官廚頓頓厭鱸魚。  
龍山雨霽開朝幕，雁汊秋喧伴夜書。  
見說羅含多逸興，扁舟肯問野人廬。

方虎第後擢庶常志喜一章

文章信有價，遇合亦有時。  
干將未出匣，焉辨雄與雌。  
時至發光怪，望氣爭見知。  
丈夫志以伸，豈在速與遲。  
吾子茗雪彥，弱齡聲譽馳。  
一經三十年，甫能貢京師。  
騎驢天

日問詩集 卷十九  
街上素衣化爲緇宗伯今哲匠攬卷大嗟奇再試冠成  
均卓哉石鼓詩旅舍何蕭條賣文給朝炊次第登兩榜  
適逢明主司平生承蜩技到此了不疑人皆爲君喜君  
心竊自悲艱難甫一第咕嗶從此辭追憶母氏教潛然  
雙淚垂竭遇木天選將還東海濬木天豈不貴所重英  
妙姿自非少壯年文采空陸離豈憶臨軒問名士無一  
遺遂使溝中木翻飛升天池可憐泥金帖聊慰倚闥思  
我客宗伯幕與君共一帷熒熒夜深燈書卷互相披有  
榻每更臥有酒亦共持談諧隨所適竟夕不言疲君敦  
兄事禮應以齒見推而我性疎放禮節無所施吾生志

千秋今已心血衰近喜文治興制誥將有詞視草任匪  
輕此事舍子誰古來重王言比之綸與絲皇皇典謨文  
俳麗心所卑努力崇大雅毋使國體虧勉旃君師恩圖  
報良在茲

送胡妙山還里

燕臺不可住況是乍寒時客到都門賤歌逢酒伴悲世  
情今已見詩句幾人知秋色江南好還山正及期

次許生洲雙松詩

萬斛濤聲百尺松風清不送早朝鐘池雖乍奪枝留鳳  
門覺難登樹是龍勁色直須看晚節高標何必踞孤峰

田間詩集 卷十九  
歲寒賴有同心伴雪嘯霜吟過此冬

夏日江友霞邀同徐方虎韓元少李協萬集郊  
外祖家園言別分韻得園字

客聚同門彥筵開淥水園倚闌看過馬解帶臥當軒鶯  
老猶疑轉蟬新不厭喧白頭方外叟醉後任狂言  
流水不知源穿溪直繞門亭臺悲故國蘆荻憶江村荷  
氣清三伏藤陰蓋一園憐君花筆燦賦別更銷魂

徐母范太君七十

海內大名徐孺子堂前老福太夫人遙憐玉殿宣恩日  
正值瑤階獻壽辰仙露分來千歲碧斑衣賜出五雲新

花照眼萱庭遠惟賴泥金送喜頻

顯亭索贈孫嘉客六十

明聖湖邊舊角巾每逢嚴助話君頻一瓊坐對青山老  
五字吟從白髮新但是有錢隨買酒從來好客不知貧  
佳晨爛醉煙霞裏愧煞都門賣賦人

中秋後二日徐原一邀同姜西溟葉子吉張素  
存遊西山馬上雜作

風塵雙眼暗出郭見青山爲趁故人興纔偷此日閒客  
心蹤跡外秋色有無間一往奇難盡相期信宿還

蘭若臨官道開門小院幽茗香行客戀詩句故人留壁

見沈仲得地能無坐趨程豈是遊海棠花覆砌且對滿

連題句

庭秋 摩訶菴

尋山逢寺入野趣是荒殘攬勝吾忘老攀崖客畏難河

流高處見

山頂望見 盧溝橋

嵐氣晚來寒祇在前村宿蒼茫耐

可看

海會寺

不宿山中寺來投路口村有牆堪繫馬無坐可開樽

其家

方初始 待月且虛榻看山祇在門輪他徐太史耐與俗

未成人言

錯到寶珠洞遙聞鐘磬音崖危牽馬上路失遣僮尋眼

界憑虛豁山門映雨深向來游興倦幾欲罷登臨

九松何代寺一路碧森森子落空庭響枝交滿院陰茗

香忘坐久苔厚覺寒侵向夕無人語微風送梵音

感恩寺看

九株白松

不見香山寺到來耳目清過橋高樹合遶殿碧泉行風

起兼松響宵深作雨聲客來貪坐久藉草話平生

香山寺與

子吉橋 邊坐話

小憩憑虛檻還扶上嶺筇路盤千尺磴陰合萬株松月

出窺疎幔風生雜晚鐘石闌留客坐緩步到孤峰

松磴

此地昔臨幸龍章額尚留

神廟書來 青軒二字

泉聲通寺聽月色

一軒收容醉偏懷古蛩吟自弔秋淒涼深夜話回首夢

中遊

酒後諸子  
歷詢遺事

零落西山墓歸鞍拜景陵寢荒搖麥秀牆缺過瓜藤正  
朔猶稱帝中官剩作僧昌平原廟近何日更同登拜景  
泰帝

玉泉源不測崖際湧如珠流作御溝水分來裂帛湖稻

梁平明灌荷芰貼池鋪近說湯除疾前人此坐無遊玉  
泉見

坐湯者  
紛紛

宗伯請告後同過興教寺和壁間宗伯原韻

蕭寺頻來為看山從前畢竟是偷閒如今得請真閒矣  
纔昇尋山到此問

定武閣

綠樹臨流小店開離城八里少人來尚書說似江南路  
坐到斜陽不肯回

贈張運青比部

玉堂才子出司刑朝論紛然盡不平官職敢將郎署薄  
人情終覺禁林清漢廷獄貴通經折中秘書偏讀律明  
每過師門陪弔客從君久坐見深情

病起哭龔宗伯八章

主恩初許乞身歸遙指家山興欲飛預擬舟航隨所適  
也知賓客未全稀詩篇唱和情難已煙水追從願竟違



定武開邊荒寺磴臨流筭坐舊漁磯  
先生得請後到定武開見流水修楊慨然憶江南風景坐憇久之歸數日遂歿

通籍登朝四十年上卿身後特蕭然交遊屢散千金囊  
歸去曾無二頃田醫店尚賒扶病藥債家空指助喪錢  
平生長物償人盡剛剩堆牀舊卷篇

日暮西廳坐客盈病餘斷酒看人傾小僮例定先期約  
老友常歸犯夜行苔蘚緣階迷履跡管絃挂壁罷歌聲  
如何隔宿成今昔  
先一夜讌集如故次日病遂不起 每過廳前涕泗橫

去年促膝榻前時欣賞新詩悔見遲遍以篇章誇坐客  
親為解釋示諸姬伯牙古調彈今罷莊叟狂談聽更誰

小豎竊知耽鄙句檢攜泉路慰幽思  
蓋棺之時小豎以拙刻田間集入殮

斗室呼瓊夜把盃常時中席我初來狂存故態偏相恕  
醉狎變童迴不猜觴政欲終防客去更籌屢報怪人催  
祇今簾幙依然挂蛛網閒封孰忍開

詩酒風流老未除臨亡底事忽跼蹙信心定是由前劫  
學道從來笑俗儒大抵聰明終不昧卽今恩愛可全無  
頻年逝者多同調莫歎茫茫冥路孤  
先生每言泉路茫茫得此作伴足恨以不

夜見三台隕大星一時哀悼動朝廷詞流屈指虛壇玷  
後輩驚心喪典型陰德漫言能益壽高閣惟信有傳經

通都行路皆嗟歎祇此嗟聲大可聽  
經旬車馬動朝昏但見靈輜有淚痕泣血孤能當大事  
陳情疏已荷殊恩故人未散孫弘閣狎客猶存翟尉門  
知在九原無所恨楚詞不用賦招魂

客園讌集酬王胥庭大司馬

名園曲曲可扶筇誰信高齋膝僅容

園取容膝易安之義

深巷人

來蒼蘚滑小橋客過野花穠朝回獨坐今司馬吟罷經  
行老秩宗倘許楚狂堪唱和不嫌乘暇日追從  
叱蹇衝筵最後來偶隨野興徑登臺秋清北闕千重見  
日暮西山萬疊開豈謂風塵存綺夏却逢賓客讓鄒枚

對君大有論詩興好待詩朋更把盃

是日坐有二客不堪唱和

王敬哉先生初度相邀爲西山之遊不獲去却

寄

西山蒼翠望中浮屢荷招攜不自由聞過桑乾欺道險  
直騎叱撥亂溪流揮毫未倦通宵興緩轡全收滿路秋  
即使追陪吾已憊似君老健正堪遊

病中呈孫北海先生

長安市上風塵昏先生塵中獨閉門連雲甲第歌鐘起  
先生門內冷如水先生行年八十餘他無嗜好惟著書  
上窮六經下史氏微言治理盡發攄手批口誦無時息

耳聾眼暗罷不得餘閒輒復工法書下筆腕有千鈞力  
平生意氣故昂藏巋然乍見鬚眉蒼人間聲色久寂寞  
古先法物堆盈牀先生先朝舊司直抗顏常在烈皇側  
卽今遺事向人談猶覩當年立朝色田間野客素不羈  
握手片語心相知授餐解衣世所感磊落之譽吾何辭  
逢人輒稱爲先賢碑記亦已錄遺書在篋何時窺先生  
磊落多英融堂碑記付錄許出先  
以手批史漢見示先生未衰吾且老頃者一病幾不保  
公子顧我榻前來深煩長者縈懷抱病中苦悔讀書少  
此生去來何草草天假我年必有因起來重問先生道  
病中蒙徐原一太史顧我榻前言別伏枕有作

送其南還

人生相知不在久徐子一見爲吾友茲晨我病子南歸  
直到牀前握我手衰年伏枕與死鄰寸心欲語難開口  
可憐徐子血性人衆中遇我情獨親平生交接最疎懶  
投君一刺風雪晨劇談荒寺肝膽露手把詩篇諷咏頻  
去秋差典京兆試誓變文風拔奇士奇文到眼人不收  
涕泣爭之甘受累朝廷翻奪主司官遭際且爲門生喜  
世上愛才徒虛名如君此誼復誰似同人八月西山遊  
夜宿香山泉上頭虛軒月皎泉聲好苦將前事恣討搜  
老夫醉中如說夢傾耳爭聽泉不流嗟君意氣向誰語

師友之間情獨苦宗伯易簣君在傍終夜隕泣紛如雨  
公子感動輸至情周全後事君爲主我聞拊牀大稱善  
古人交情生死見今人不識君古人祇將兄弟科名羨  
君今暫歸慰倚閭予亦還家守舊廬此身一病一回老  
晤言卽恐從今疎故鄉相去千餘里何時寄我樅陽書  
寄朱錫鬯通州幕中

吾友朱生家角里相國曾孫名父子圭璋自是廟廊珍  
翻然竹垞稱高士予亦避世栖田間相逢却在長安市  
君之才名四海知諸侯爭致惟恐遲金石碑版搜欲盡  
大書小篆無不奇文章落筆妙天下餘技尤擅花間詞

我有才華亦蕭索況復老病心情惡宗伯歿後心最悲  
欲哭長歌不敢作病中聞子八哀詩伏枕吟之淚潛落  
子詩情至後必傳每誦子作心爽然此事亦恐應酬奪  
喜子近得主人賢古人著書須閉戶況有竹垞堪歸田  
我老不忘舊遊地猶擬來汎南湖船

晚過葉子吉編修有作

天街塵凍馬蹄乾門掩雙扉暮色闌蒼蘚半階緣客破  
青氈一榻向人寒暇時擬問圖書秘直日常輪記註官  
更勅講章親繕寫先期呈進御前看

應門不報徑披帷乍見纔如出定時東觀繙餘無秘本

西山遊過欠新詩文逢主好頻催試官讓人先一任進  
却怪老狂疎拙甚論心偏荷最相知

之通州途中遇風有懷錫鬯幕中

客程遙指近通州風起塵昏障馬頭  
鬢面逢人驚土偶車輪爭路鬪泥牛  
翻悲滄海掀揚日却憶乾坤混沌秋  
咫尺城中油幕客攤書正坐擁重裘

客店不寐寄懷錫鬯

襪被單裝宿潞河風嚴旅舍夜難過  
博徒徹夜呼梟雉軍吏當門繫馬騾  
鼓絕三聲更漸緩窗開一罅月偏多  
高朋擬共圍爐話隔院天涯奈我何

題錫鬯荷鋤小影

見說栖山未有山一生心事此圖間  
每因雨夜催耕起恰向溪頭放水還  
自去自來誰作伴爲農爲圃總成閒  
時人欲問柴桑路祇在南湖角里灣

哭陳鳳倩

二十年來客帝畿空餘靈旆返山扉  
遊于垂老真宜倦病到臨危不及歸  
河路問關移櫬遠交親寂寞助喪稀  
哭君還自傷遲暮江國今存幾布衣

未衰早見髮全新酒後揮毫徹夜頻  
賣賦舉家皆待哺謀生半世祇成貧  
帷前哭踊嗟猶子

適阿咸至爲治喪

身後經

營仗故人

後事皆顯  
亭為經理

檢點遺篇增涕淚總由此道損心

神

季冬望後李湘北司成大集詞客作公讌詩索

和

自我適京邑兩見歲序移杪冬倏又半圓月漸以虧賴  
有同聲友文酒日相迫太史金閨彥司成國子師下士  
每折節雅道賴總持良夜設高宴所集英妙姿華燈燦  
廣席醪醑湛清卮授簡集錦句揮翰成麗詞娛情聲律  
間何必竹與絲長安盛游客文采良在茲亦有數白叟  
言是壇坫遺廟坐羣彥中顧影黯然悲太史發高唱元

氣何淋漓和者珠玉盈迅若風颺馳平昔鬪篇章今老  
無能為坐看汗血奔益覺驚駘疲奉教完斯篇甘受孟  
罰遲

送張素存編修假歸省親京口

張翰扁舟去莫攀宦情早為乞歸間囊因好學常資筆  
門畏求書只掩關計日瞻雲趨北固臨時騎馬別西山  
老夫穩臥江村久翻滯長安送爾還

吳茂孫謁選都門晤間有懷王而農

憶昔分攜端水濱同時去住困風塵天南十載悲逋客  
冀北三冬遇選人吾道未妨蹤跡異交情終在亂離親

衡山曾問牆東隱聞說終年舊角巾

癸丑歲暮飲退翁齋憶芝麓宗伯同紀伯紫作  
歲暮開樽話客愁對君猶見古風流中朝典故存黃髮  
海內交情重白頭耆舊可憐遺一老見聞都合付千秋  
酒闌忽酒西州淚寂寞那堪碩果留

田間詩集卷第十九

田間詩集卷第二十

客隱集 甲寅

甲寅元旦 時有滇南之警

兩度逢元旦三年客帝京應酬當事廢慶拜故鄉情遲  
暮嗟羈旅餘生望太平湖南消息斷即恐未休兵

風鶴江城近羈人慮萬端久無家信至空恃酒杯寬亂  
定傳聞始兵過客路難蘆溝魚有禁何處寄平安 時蘆溝橋

搜書不得通

新春連日大雪口號二首

一冬雨雪無消息白入新春總未晴大宅人稀煙不起

時龔氏僅僕俱散去天街馬踐淖難行擁爐坐久灰頻陷呵凍書

勤筆有聲游客日來南去盡窮愁獨滯老儒生

北山樓上小窗關遙憶窗前雪滿山眼暗茅檐飄撇處  
氣昏蕭寺有無間將枯老樹寒偏古半破懸崖凍莫攀  
江上晚來多畫意却緣底事不能還

送嚴蓀友南還

扁舟冰雪阻江關匹馬衝泥去莫攀初約余共舟南還以冰堅改從陸去

紫陌豈宜淹阜帽白雲終是戀青山侯門謝客原耽靜  
幕府留賓未許閒見說主人情繾綣質君書卷要君還

贈張豫章

雲間詞客滿京都公子才華絕世無乞句筵前佳麗集  
求書門外吏人趨揆懷散給皆爲錦擲地爭看并是珠  
心血富饒應愛惜似余耗却老全枯

金門射策有家傳賣賦長安亦偶然謝客偷閒春雨裏  
溫經得力夜燈前交游已盛難辭酒文字雖工不值錢  
堂上老親今七十稱觴須待錦衣旋

贈陳緯雲

一春高會帝城頻密坐論心爾最親席上應酬駢句好  
花前贈答小詞新與逢得意先判醉情到傾囊不顧貧  
却憶阿翁交滿世名成端藉後來人



方虎苦貧詩以慰之

茗溪才子玉堂賓擁戶蕭條風雪晨我自病餘真覺老  
君從第後轉憂貧質衣莫漫邀尊酒減米惟應散僕人  
近日國門稱貸絕脫簪遠寄恃孀親

酬徐公肅司成

君家兄弟交情古前輩風流今尚存庭館慣留高士榻  
生徒矜出大賢門邀歡徹夜神逾王折節窮儒道益尊  
幾度登筵頻值雨銜杯堅坐聽狂言

頭白名壇未見遺每逢開閣亦追隨微言妙解談諧裏  
雅量爭雄半醉時序坐自傷衰老僭論心先荷令兄知

南歸倘踐扁舟約準寄西堂唱和詩

時健菴有  
信見約

贈黃伯和庶常

談諧永日接清歡冰署依然僧舍寒導引有功應自恃  
篇章過目不重看攀花上苑偏驚易索光長安轉覺難  
莫信仙師教采藥幾人乞得大還丹

伯和學道有  
效末句諷之

將出都留別方虎

同學情親欲二年雨聲燈影夜窗連故人未許辭蓮幕  
才子爭推入木天作宦較添爲客累成名翻奪賣文錢  
憐君多病無僮僕那得分攜不黯然

直性多言汝不猜相知豈只互憐才爲親師友移居近

日問詩集 卷二十一  
欲話窮愁緩步來情至反無詩可贈交淡都覺禮堪裁  
卽今朝夕惟張翰誰叩閒門日幾回

贈王五兄子喜

謝傅庭前玉樹枝穿雲裊露總稱奇友于樂在承歡日  
富貴生從墮地時設榻慣留南國客耽吟苦愛老夫詩  
可知第五名原重不藉家聲已共知

天津道上作

漫漫官道一沙平向曉沿溪破霧行村市蕭疎憑指顧  
河流屈曲與逢迎交叉路口隨驢去亂塚堆邊竝馬耕  
遲暮未嗟筋力憊加鞭猶可及前程

去歲凌兢出國門潞河中返待春溫短裘風急寒仍重  
大漠塵高日易昏小妓暗通留客店圍兒早候換驢村  
春來漸少南船到關務重重亦太繁

津門書所見

雙流遙隔指津涯帶郭炊煙十萬家占籍有貲惟賈客  
買鮮無日缺魚鰕開關市涌南來貨過渡人迎北去車  
近報傳烽爭買宅許多潛避出京華

天津鹺署與徐巖叟話舊

帝城東出向天津破帽衝風訪故人鹺政歷年頻奏最  
吏才何處不稱神梗萍忽散滄江遠車笠重逢白髮新

屈指分攜三十載荷君猶念昔交親

憶在閩鄉悵別年紅燈綠酒話烽煙雲霄取路君偏捷  
虎穴抽身我倖全遺愛每聞人吏誦交情時有宦遊傳  
卽今回首論心地水碧山青盡可憐

古驛蕭條吏散初殷勤猶接使君書祇知遠害身空隱  
豈謂逃虛計轉疎遠渚漫尋鷗鳥夢名山盡屬虎狼居  
當時百折崎嶇裏說向尊前應哂予

近歲檉欄我再過吟詩蹋徧故山阿隨車老吏身仍健  
侍酒變童髻已皤東國爭傳新政事南天猶憶舊絃歌  
看君高足今初騁自分泥塗柰老何

留別韓元少脩撰

書生特達主恩新臭味偏憐老逸民道在篇章頻問難  
情緣師友倍交親賜衣質酒時招客受詔脩書數避人  
方脩孝却笑同門徐太史比君高興共君貧  
方虎娶姬元少仍獨處

巖子問七十嶺亭索詩爲壽

憶昔文壇樹幟年君家兄弟最多賢門庭好客論交慎  
家世爲儒信佛偏晚歲應裁居士服佳晨早上放生船  
莫嗟合浦珠頻失

子問連有喪明之戚

老蚌光明正燭天

宗門一向苦參求七十年來了得否知己弟兄爲至樂

日聞詩集 卷二十一  
賺人兒女豈深憂天饒歲月看滄海世讓湖山與白頭  
料想懸弧朝避客藕花淡處繫扁舟

暮春出都門馬上口號

輪蹄逐伴出春城一路看山信馬行恰是今朝好晴景  
千峰讓出雪峰明

三月春光柳色催梨花迎客馬前開熏風一樣江南好  
只苦紅塵撲面來

青青麥菜滿平疇楊柳村邊萬綠稠最是桃花闌不住  
出牆陣陣紫煙浮

青郊一望柳千條路口人家帶白茅楚客祇疑新筍迸

檀欒摘出過牆梢

途中雜詩

京西千里地袞袞入黃埃兵過村皆廢人稀店不開軍  
麾同路發羽騎卷塵來向晚爭投宿前途立馬催

去任由人制行藏自赧顏無邊河北路不斷太行山百  
戰興亡地千秋指額間平生懷古興未許馬蹄閒

未到清風店聞名心已清兩邊高柳合一帶晚蟬鳴疲  
馬迎涼健征衣入暮輕加鞭思騁步猶起少年情

雞鳴行李動逐伴耐朝飢小驛人爭馬空牆客和詩雨  
遮襄子國沙沒信陵碑滿目悲歌地乘軒那得知

何年開甬道今已半頽垣砦散防兵打村空賀婦存梨  
花迎路放柳絮逐塵翻燕趙佳人地誰銷浪子魂  
結茅無比屋茅屋皆特起如亭穿竇信如圭沙闕榆分陌疇平  
麥少畦雨中黃鳥度煙外杜鵑啼客伴愁相失南征馬  
不迷

又十一首

常山形勝地城郭至今雄客起悲歌興人存河朔風千  
峰凭堞近一水繞壕通想到荷花放清香滿郡中真定府  
春淡沙不凍未曉涉滹沱水落無舟候橋平竝馬過波  
聲東去小山色北來多何事詒諸將乘冰急渡河滹沱河

十聖沙河路離城一望平過風無去迹植石表前程石  
浩江心渡漫漫雪裏行殷勤吾老友遠訊見交情過沙河劉

杜三遣騎見訊

過盡沙河路林陰暫駐鞍忽驚追騎轉遙擲赫蹄看敘  
別廿年久經過一面難僮兒傳遠念述罷涕汎瀾示劉杜三

使者

古藤何代樹花覆晝冥冥引蔓垂千尺分陰蓋一庭逢  
僧邀小憩立馬嗅微馨底事炎曦裏衝塵不暫停壽藤菴  
來往邯鄲道盧生正熟眠人嗟方入夢吾羨是真仙卽  
此機全息原無道可傳勞勞塵裏客高臥是何年黃梁夢

平生懷鄴下白首渡漳河風急爭舟楫沙淡陷馬羸三  
臺不可見疑塚至今多千古英雄恨無如老去何過漳河

孤城煙不起近市小橋通立馬殷墟地長懷衛武公潺  
湲淇水響蕭瑟竹林空濮上今何處臨流憶國風淇縣

我懷淇澳竹欲見一竿難聞道百泉上森然萬箇寒官

廚求異味新筍佐朝盤却憶江南客僧房正飽餐衛輝署中

初食

渡口行將近前驅吏過曾河催官早祭舟讓馬先登到  
岸風偏順中流浪始興南歸從此便無意更憑陵過黃河

### 汴城感舊

千里長堤護築牢一時魚鼈劫難逃沙平決口流全改  
屋出城頭地益高睥睨栖鴉纔有樹田疇負郭久無壕  
居民百萬生理沒井下時聞犬夜嗥

人事天心迴莫猜夷門駐馬不勝哀城頭官棧浮皆出  
地底人家死未灰花石可能尋艮岳悲歌只擬上繁臺

周王宮殿初沈水猶照朱屏幾扇開有言河初決時水浸宮牆而沙未沒

猶於水中見

大梁署中示余鴻期諸子

栖同小院臥連牀茶罷軒軒午夢長高柳隔牆常借蔭  
雜花滿架乍來香憂時祇幸傳聞安望雨偏嫌早暮涼

却笑素餐諸老友殷勤莫助主人忙  
 自愛松風沸茗鐺取泉郭外苦無清閒看僕園新調馬  
 夢怕江鄉數過兵窗曙暗知更漏促庭虛兩見月輪明  
 湖南閩嶠軍書斷樂得官衙話太平

寄懷都門六首

三年官舍酒頻傾自出春明悔此行坐上談疎清簟冷  
 籬邊屐罷紫苔生靴裘贈別登程便藥餌扶衰上馬輕  
 擬過黃河分路去徘徊深惜故人情

余住廬民部

詞林不次荷恩光橐筆朝朝侍御牀蓮燭撤來歸院晚  
 官衣著出退朝香從游應制多風諫啓沃輪班進講章

料是天炎今暫輟閒吟時憶老詩狂

孫此瞻侍讀

二策名高動帝京披帷還聽讀書聲應酬不廢神常靜  
 輦血常除性本清豈為持經多道氣更因力學慎交情

懷君此際緘窗坐我正衝塵冒暑行

董方南庶常

王家最小佳公子過市愁人擁巷看綵筆巧霑吳女黛

細君為

班衣獨炫子衿寒

一門中獨為諸生

尚書垂老偏憐少

司馬為兄亦覺難遙憶紙窗花覆處書聲隔院正承歡

王六兄子靜臨別索句却寄

青箱堂上別筵開大小尚書共把杯經學家傳憐一得  
 詞壇世擅賞微才夢回東閣留賓住身悔中州入幕來

已約繁臺秋後出故人書札莫先裁

王敬哉胥廷尚書喬梓許致書中州

當事爲刻  
易學諸書

兩年賓閣動招尋自別春明悔至今忘分祇緣同學早  
相知終是舊交淡田園穩臥何時事經學流傳此日心  
我到嵩山遊卽返窮愁肯向俗人吟

嚴顛亭  
副院

由汴入雒途中雜述

汴城西出路漫漫古驛蕭條客店殘正好三更催勒馬  
但逢獨樹一停鞍荒田待雨耕人少赤地無陰候吏難  
逐伴隨車傷老大道傍指作幕賓看

炎夏趨程使者車紅塵一路馬頭遮茨梁喜見堆場麥

苜蓿閒開絕域花過驛懶陪常例酒回鞭爲受結緣茶  
汴渠堙盡成官道何處堤楊有暮鴉

崎嶇京索馬蹄艱劉項相持在此間狹路經過餘絕澗  
平原指去是青山清風不進滎陽隘斜月猶懸汜水關  
紀信祠前芳樹合無由暫駐一躋攀

平生攬勝未辭勞杖筇先登度虎牢忽聽水聲知洛口  
遠回山勢見成臯舟航尚憶厥倉近戰伐徒餘壁壘高  
立馬提鞭聊指顧元龍老去氣空豪

帶郭岡巒互北邙嵩山回避遠蒼蒼沙邊上日瞻星白  
渡口無風見水涼斷袖童憨偷躍馬采藍婦早省喬妝



迎車大有都人士文物遙憐舊雒陽

渡洛水望三室懷登封葉慕廬明府

我從洛口渡馬首萬芙蓉念子彈琴處門前翠幾重雲  
開分少室月出正中峰夜半吟詩罷時聞岳頂鐘  
成臯迂道出特地避嵩山常恐遊人意遙存蒼翠間俗  
情寧足怪吾事肯空還定擬尋仙令秋來到處攀

贈戴生生爲應子山所囑攜入署中

休璉老去興無窮賴爾相依入幕中慧質清姿憐不盡  
最憐肯戀白頭翁

爲愛鷓絃曲調悲閒窗偷學畏人知老夫欲試春鶯囀

先教低聲背小詩

非絲非竹有清音擁榻居然洛下吟天性愛親風雅客  
莫疑詩卷是琴心

吳漢章曲師索贈

名擅歌場四十秋也知狂客舊風流彩毫拋擲湘絃啞  
一樣人欺老白頭

別朱雀門學憲

衝炎遠逐後車塵白髮慙充幕裏賓久已諸侯爲刺客  
幸隨老友作閒人風煙滿日傳聞惡兒女關心夢見頻  
況聽秋聲歸益切滄江還有舊漁綸

留別余鴻期

燕臺傾蓋忽三年來往頻過寓館前  
茗熟早虛高坐待榻陳一任老夫眠  
詩篇好我常親寫經學逢君恨未傳  
別後倘因歸路便縱陽江上暫停船

湖海平生興不窮無端老去閉樊籠  
論心賴得滄江伴入夢虛隨白髮翁  
先時鴻期夢與余共事漫擬買山娛暮景且期  
歸馬趁秋風應知別去時相憶茗椀燈窗半載同

宿鞏縣

高山不可到夜宿洛川東  
小縣破山下人家陶穴中  
成皋分楚漢廣武笑英雄  
工部坊虛設杜甫故里坊何人繼大

風

南還途中雜詠

纔入新秋別洛城聞雞起趁早涼  
行芰荷香裏江村夢麻菽葉邊山  
雨聲伴有北人先膽壯騎須快馬  
始身輕殷勤健吏相扶持一路安閒  
老友情雀門遣吏相送  
南風拂面雨來初半日常行百里餘  
路穩恰逢兵甫過塵清頓覺暑都除  
輶車大抵通秦晉風物遙憐接鳳廬  
但聽鄉音頻借問隔江烽信近何如

宿道口題和壁間韻

風塵十日變容面一程一程近鄉縣  
管麻葉上雨聲催

歸德城樓遮不見道傍茅屋且停車迎門老翁六十餘  
問年與我生同歲閒坐收錢媿不如

蕪關訪蘇韋玉進士信宿晤新安程抑若卽席

言別

布帆收港雨初昏小艇尋君直繫門屋辦貯嬌權下榻

韋玉方治妝閣卜日迎娶客惟求舊與開尊程君爲韋玉受業師亦老詩人篇章未

覺才華盡壇坫猶憐碩果存莫怪故人容易別上游風

鶴近江村

蕪關訪房興公庫部樵使

二月分攜出帝京忽驚江岸徧秋聲看山氣到關門紫

挂席風因使者清兵馬沿途游興倦家鄉隔岸客愁輕  
也聞樵稅蕭條甚可遂平生好士情

蒲颿風利柁如飛叩閣爲遲一日歸商趁官廉輸稅急  
船愁兵過上關稀軍興國課知難減客到朋尊願不違  
我住縱川一水便詩筒頻與寄漁磯

興公邀同唐祖命楊吉公夜集南禪寺限韻卽

成

年來唱和半關中草草江城集偶同僧舍乍開黃葉徑  
吟壇還試白頭翁銜杯待月寧辭醉刻燭催詩豈顧工  
爲語羣公趨授簡莫教獨讓老夫雄

日向詩集 卷二十一  
向友人乞白菊花

菊乘秋氣放白更稟金精能益顏顏壽兼開老眼明相  
尋常冒雨數問爲餐英采摘東籬下應憐遲暮情

過溪莊與劉超宗有卜鄰之約

大龍溪處一莊偏野磻荒橋屐屢穿葉滿林塘尋去路  
松藏屋宇見炊煙杜門每趁完詩債好客多虧賣畫錢  
我老欲依姻婭住煩君爲覓近山田

過有懷便足樓有作

壘石倚家山登臨不啓關湖明疎樹外屋小萬松間意  
取讀書便身因知足閒老夫頻到此容易得躋攀

雨中又作一首

竹裏廚煙起雞鳴自一村地高皆可見宅近竟無喧湖  
縮湖光破雨搖山氣昏與君三世好來往幾人存

同有懷超宗自柴嶺下過程伯韜居不得留

策杖來從嶺上頭竹間茅屋苦相留同遊客散斜陽裏  
辜負山家滿院秋

射蛟臺懷古

漢皇此地駐樓船萬里旌旗在眼前遺蹟尚誇今父老  
荒臺空憶舊山川邊溪楓葉寒漁屋夾岸蘆花白渚田  
陵谷幾隨人事變等閒興廢漫淒然

酬將樂余不遠過訪田間

自別雙峰髻總華五年三到老夫家  
新詩小閣留題在暮雨荒村問路賒  
羈旅所資惟筆墨亂離何處是生涯  
要君度歲無他獻屋角寒梅正放花

示冠孫

吾孫七歲卽知音能讀翁詩繞膝吟  
可識老翁吟太苦推敲耗盡一生心

飲先宮係墓側人家

雨暗尚書墓秋深處士家  
室香初製藥庭小襍生花  
蟹早村難得漿新市肯賒  
自矜今晏起罷聽鼓趨衙

終卷